



# Taulogologo

Mati 2022

## I tulaga maualuluga, ma nofoaga maualuluga. Afai o lo la faamoemoe lea, oi talofae.

O lo'o taua e Mataio 20:20-21. Na Matua'i o ane lenei au uso ma lo la Tina ia Iesu. Afai o lea, o lona uiga, e moni lava, ole lagona fo'i lea o lo'o tupu pea ma ua faapulu salalau i totonu o mafutaga ma sosaiete aemaise le Ekalesia. Sa ta'utino atu e Iesu, " Lua te lei-loa le mea e lua te ole mai ai na..." O lo la fesiligia o la tulaga i le mamalu ole Alii, ole fia auai faatasi lava lea i ona puapuaga.. ole mea la lea la te le'o iloina, a ua aliali mai ai le va'ava'a, e fa'alelalolagi lava o la fa'amoe-moe. Leitioa le gagana a tamaiti le isi nu'u, " Think before you spiki." E faigofie le fai atu e mafai ona inu ile ipu, ma papatisoina ile papatisoga na papatiso ai le Alii. Peita'i, ole IPU a fetalai i ai Iesu, o ia lava lea, aua ole avea o ia e fai ma IPU e sasa'a atu ai le to'asa o le Atua ile agasala, e ala ai lana faamasinoga amiotonu. Ole papatisoga fo'i a sauni atu i ai Iesu, o lona tau'aveina lea ole faamasinoga a le Atua i le agasala seia tini lava i le oti.

E papatisoina o ia e le Atua lona tama, e ala ile fa'ae'e atu i ona luga o puapuaga. O le loloto lea o Upu a Iesu e le o malamalama i ai Iakopo ma Ioane. O lo la mana'o,ua na o'i latou lava ua saunia mo i latou lea mea. Ioe, ole faamanatu mo oe ma a'u, 'aua le iloina loa se mea, ona pei loa ole pulu makau tulou le alu. O le fa'a -Iesu -ina, po'o le avea ma so'o faamaoni, e savali ile va o luko feai. E

le laulelei, e le maua loa lava, e ao ona ma'osiosia muamua ma tofo i tiga, afai e mafai, praise the Lord, a le mafai, toe taumafai atili. Aua le faaseseina pe mulimuli i ta'a'iga a isi tagata. Ole lagi e te tamo'e lava oe e tuli i luma lou faamoemoe seia o'o ina tau lou ai, manatua e tini i le oti. Ile ma le isi mea taua le au uso e, e na'o e e faalogo ma faatuatua moni ia Iesu Keriso. O le mana'oga moni lea mo i latou, ia maua a'oa'oga a Iesu ma ia ola ai. Ae lē na ona mana'o i tofi o lenei ola ma gata ai. Ta'ita'i ma galue fa'a-auna. A fia galue se tasi,ia mua'i tautua. Pei o Iesu, na afio mai ina lē 'au'auna atu tagata ia te ia, ae ia 'au'auna o ia ma foa'ina lona ola e togiolaina ai tagata e toatele.

Manuia tele la tatou faigamalaga faaleagaga o lenei vaitaimi ole Fagafulu. Ia malutia lo outou soifua ma so matou ola e Iesu Agaalo-fa mamana, ma tatou sauni e toe malaga fa'atasi fa'aleagaga ma Iesu "A'O AGA'I ATU I LATOU I IERUSALEMA."

Manuia ona o Keriso

Vaueli & Veronika Tolova'a (FKS Naenae)

Tatou tatalo: Iesu e lo matou Alii, fesoasoani mai i lau fanau a'o matou faimalaga fa'aleagaga i lenei fo'i Fagafulu. A'oa'o mai pea lou Agaga ina ia matou iloa lou finagalo ma ola ai, a'o matou taumafai pea mo lau Afio. Fesoasoani mai ina ia matou ola i lalo o lau lava Pule, ae lē o le fia mamalu e pei ona matou tauva i ai.

## “TUTŪ FA’ATASI” O LE FE’AU AUTŪ LEA

Ua lua nei tausaga o tatou tali atu i Lu’itau a le Koviti – 19. O lenei fa’ama’i ma mea uma na aumai fa’atasi ai o lona uiga ua tatau ona tatou toe mafaufauina pe fa’apefea ona tatou feso’ota’i, pe fa’apefea ona fai talosaga, pe fa’apefea ona a’oa’o atu, pe fa’apefea ona tatou feso’ota’i ma o tatou aiga ma suli a o tatou fa’apotopotoga fa’afa’atuatua (palisi ma a’oga).



tatou lē fa’atasi. Ona o ni ta’ita’i (tatou uma) ua fa’aosofiaina ma fa’aeaina ina ia tatala atu o tatou loto i isi, ma fa’afaigofie ai ona tatala o latou loto ia i latou lava, latou tuā’oi, i le lalolagi, iā Iesu ma le Atua.

“Fa’atasi” o le fe’au autū o la tatou tali atu o ni so’o. ae e faigata ona fai pe a tatou iloaina, mo le saogalemū mo isi, e tatau ona faia ni ufimata ma tausi le va ma isi. E ono o mai fa’atasi pe afai

ua tolopo pe le fa’ataunu’uina fo’i le tele o fuafua mo fa’atasiga ma isi polokalame.

E ui i lea o tatau o tagata o le FA’AMOEMOE, o tatou o tagata o le LOTOTELE. Ou te fa’amoe-moe o le tatalo lenei e fesaosoani iā i tatou a o tatou faimalaga atu fa’atasi i le 2022.

Le Atua fa’atasi ma mafutaga ua tapunia

Le Atua fa’atasi ma Mafutaga ua tatala atu i latou le au ulua’i fa’atuatua i le toetu Potopoto i le fefe i potu ua lokaina.

Se’ia sau ma avea o tatou

le agaga o le afi ma le feso’ota’iga, o laulau faiva o gagana i aso ta’itasi. Alu ‘ese mai o tatou matata’u, ia tatou maua upu mo le fea’u tatou te fa’asoaina. Ma ia tatou potopoto mai i le matagofie o le tala lelei o lenei lototele

O tatou olaga o ni so’o o Iesu e uiga i mafutaga feso’ota’i, ‘au’aunaga e uiga i mafutaga feso’ota’i. Fa’aso’oaina e lē o le fa’atinoina o galuega, ae o lona uiga o le feso’ota’iga o le tasi ma le isi. Sa fa’apea lava talu mai le ulua’i fa’apotopotoga Kerisiano (Faitau Galuega 2: 42 – 47). Ae ui i lea, ua fa’alavelave le Koviti iā tatou fa’apotopotoga ma o lea o a tatou mafutaga feso’ota’i i le tele o auala:

E lē masani ona tatou feiloa’i ma ni ufimata. Tatou te lē vivi’i i le va’ava’ai i se tv, o tatou o se Ekalesia liu tino ma e mana’omia le i ai fa’al-etino, o tv atonu e fesoasoani ia i tatou e tatalo, ae e lē o se auala masani a tatou e fai talosaga ai. Ona o le tapunia po’o le lokaina, o le ‘au ai i se olaola ai i se va feagai ai ma isi (i aiga ma palisi) ua ave’ese ma le iloa masani i faiga fa’atafa’ilagi ua fa’alavelave i fa’atasiga e masani ona aumaia le mafana ma le olioli.

O avanoa o ni faife’au ma faia’oga, o ni suli o aiga ma fa’apotopotoga o le a fesoasoani lea o le tasi i le isi ina ia tatala atu o tatou mafaufau i le Tusi Pa’ia. E fai sina faigatā ona fai lenā pe a

## FE’AU A LE TAMĀ PA’IA MO LE FAGAFULU 2022

“Aua ne’i tatou fa’apalapala i le amio lelei, auā o ona po e tatau ai tatou te selesele mai ai, pe afai tatou te lē fa’avaivai. O lenei, ia tatou agalelei, ia fa’atatau i mea e tutupu i lea aso ma lea aso, i tagata uma lava” (Kalatia 6: 9 – 10)

Uso ma Tuafafine

O le Fagafulu o le taimi lelei mo fa’afouga a le tagata lava ia po’o fa’apotopotoga, ona e ta’ita’ia ai i tatou i le misitelio fa’apaseka o le maliu ma le toetu o Iesu Keriso. Mo la tatou faigamalaga mo le Fagafulu o le 2022 e lelei pe a tatou tomanatu i apoapoa’iga a Sagato Paulo i tagata Kalatia: Aua nei o tatou fa’apelepele i le amio lelei, auā o ona po e tatau ai tatou te selesele mai ai, pe afai tatou te lē fa’avaivai. O lenei, ia tatou agalelei, ia fa’atatau i mea e tutupu i lea aso ma lea aso, i tagata uma lava.

### TOTŌINA MA LE SELESELEINA

I nei upu ua fa’aogaina e le Aposetolo le fa’atusa o le totōina ma le seleselega, e pele iā Iesu (cf. Mataio 13). Ua talanoa mai Paulo ia i tatou *kairos*: o se taimi lelei mo le totōina o le lelei i se va’aiga ma se seleselega i le lumana’i. O le a lenei avanoa tāua mo tatou? O le Fagafulu ua mautinoa o se avanoa tāua, ae fa’apefea fo’i o tatou olaga atoa, i se isi va’aiga o le Fagafulu o se fa’atusa. E masani i o tatou olaga, mana’otele, fa’aalialia ma le fa’anaunau i le ‘oa, fa’aputu ma le fa’aalu ua manumalo, e pei ona

tatou va'aia i le alu fa'avalevalea i le fa'ata'oto mai le Evagelia, sa manatu o lona olaga o lo'o saogalemū ma mautū ona o le tele o saito ma oloa sa ia teuina i ona fale saito (cf. Luka 12: 16 – 21). O le Fagafulu ua vala'auina i tatou ina ia liliu, ia suia o tatou manatu ina ia maua le matagofie ma le moni o le olaga, e lē o le tele o oloa i lo le foa'i, e lē o le tele i fa'aputuga e pei o le totōina ma fa'asoa le lelei.

O lē na mua'i totō o le Atua lava ia, o lē e anoanoa'i le agalelei “ua fa'aauau ona totōina le anoano o fatu o le agalelei i o tatou aigā tagata (Fratelli Tutti; 54). I le vaiata o le Fagafulu ua vala'auina i tatou e tali atu i le mealofa a le Atua i le talia o lana Upu, “o lo'o ola” (Eperu 4:12). O le fa'alogo so'o i le Upu a le Atua ua tatala atu ai i tatou ma le fa'amauualalo (cf. Iakopo 1: 21) ma fua mai ai ni fua lelei i o tatou olaga. O lenei e aumai le olioli tele i o tatou olaga, ae o lona fa'asilisili lava, ua 'amia i tatou e avea ma ē galulue fa'atasi ma le Atua (cf. 1 Korinito 3: 9). I le fa'aogaina lelei o le taimi nei, o tatou fo'i e mafai ona totōina le agalelei e lē tatau ona va'aia o se avega mamafa ae o se kalasia, o lo'o mana'o Lē ua foafoaina ina ia tatou galulue fa'atasi ai ma le anoanoa'i o lona agalelei.

Ae fa'apefea mai le seleselega? Tatou te lē o totōina 'ea le fatu ina ia tatou seleseleina? Ioe! Na fa'ailoa mai e Sagato Paulo le feagai lelei i le va o le totōina ma le seleseleina ina ua fai mai: “O lē ua itiiti ana saito e lulū, e itiiti fo'i ana e selesele mai, a o lē ua tele ana e lulū, e tele fo'i ana e selesele mai” (2 Korinito 9:6). Ae o le a le ituaiga o seleselega o lo'o tatou ta'ua nei? O se fua lelei muamua o le agalelei ua tatou totōina ua alia'i mai iā tatou lava ma o tatou olaga i aso ta'itasi, e o'o lava iā tatou galuega laiti o le agalelei. I le Atua e leai se gaioga o le alofa e itiiti, ma e leai se “taumafaiga alofa” e lē iloa atu (cf. Evangelin Gaudium 279). E pei ona tatou maitauina se la'au i ona fua (cf. Mataio 7: 16, 20), o le mea lea o se olaga e tumu i galuega lelei e susulu atu ai le malamalama (cf. Mataio 4: 14 – 160) ma aumai ai le nanamu o keriso i le lalolagi (cf. 2 Korinito 2: 15). O le 'au'auna atu i le Atua i le sa'olotoga mai le agasala ua aumai ai fua o le fa'apa'iaina mo le fa'aolagata o tagata uma (cf. Roma 6: 22).

I le moni lava, ua tatou va'aia na o se vaega itiiti o fua o mea ua tatou totōina, ona, e pei ona fai mai le fa'ata'oto mai le Evagelia, “ese lē lulū saito 'ese lē selesele” (Ioane 4: 37). A tatou lulū mo le lelei o isi, ua tatou fa'asoa mo le alofa o le Atua lava: “E tamali'i moni pe a tu'uina atu o tatou fa'amoemoega i le mana natia a le fatu o le agalelei ua tatou lulūina, ma amatalia le faia o na fua o le a seleseleina e isi (Fratelli Tutti, 196). O le lulūina po'o le totōina o le agalelei mo le lelei o isi ua fa'asa'olotoina mai ai i tatou mai manatu fa'apito iā i tatou lava, fa'asūsū ai o tatou gaioga o le alofa ma le fa'asoa, ma avea ai i tatou ma vaega o le tafa'ilagi matagofie o fuafuaga alofa a le Atua.

O le Upu a le Atua ua fa'alauteleina ma si'itia ai la tatou va'ai: “Ua ta'u maia iā i tatou o le seleselega moni o le maliu, fa'amasinoga, ma le taunu'uga mulimuli a le agaga ma le tagata, le seleselega mulimuli, le aso gata'aga. O fua ua matua o tatou olaga ma amioga o “fua e o'o i le ola e fa'avavau” (Ioane 4: 36), o tatou “oa ile lagi” (Luka 12: 33; 18: 22). O Iesu lava ia na fa'aogaina le fa'atusa o le fatu e mate i le 'ele'ele ina ia fua mai ai ni fua o se fa'aaliga o le misitelio o lona maliu ma lona toetū (cf. Ioane 12: 24); ae o Sagato Paulo e fa'aogaina le fatu lava e tasi e tautala ai i le toetu o tatou tino; (1 Korinito 15: 42 – 44).

O le fa'amoemoe mo le toetu o le malamlama sili lea na aumai e le Keriso toetu i le lalolagi, ona “Afa'i e gata i lenei olaga mea tatou te fa'amoemoe i ai iā Keriso, ua sili lo tatou malaia i tagata uma lava. A o lenei, ua toe fa'atuina mai Keriso i e ua oti, ua avea ma fa'apolopolo o e ua momoe” (1 Korinito 15: 19 – 20). O latou e mafana le latou mafutaga ma ia “i le fa'atusa o lona maliu” (Roma 6: 5) o le a fa'atasa i lona toetu i le ola e fa'avavau (cf. Ioane 5: 29). “Ona pupula ai lea o e amiotonu e pei o le la i le malo o lo tatou Tamā” (Mataio 13: 43).

“AUA NE'I O TATOU FA'AVAIVAI I LE FAIA O LE LELEI”

O le toetu o Keriso na fa'aolola ai o tatou fa'amoemoega fa'alalolagi nei i se “fa'amoemoe tele” i le olaga e fa'avavau, i le totōina o le fatu o le fa'aolataga i o tatou taimi nei (Penitito XVI, *Spe Salvi*, 3; 7). O mafatiaga tigā i miti ua lē taunu'u, popolega loloto mo lu'itau i le lumana'i ma le leai o se fa'amalosi'au i le mativa i puna'oa e fa'asoasoaina ai i tatou e sa'ili se sulufaiga i le manatu fa'apito iā ia lava ma le leai o se manatu i puapuaga o isi. Ioe, e o'o lava iā tatou lelei e i ai fo'i o latou muta'aga: E vaivai ma tigaina tama matutua, o taulele'a fo'i e pa'u'ū lava i latou” (Isaia 40: 30). Ae o le

Atua “e avatua le malosi i ē vaivai; a o e ua leai se malosi, na te fa’atuputele i ai le malosi a o e fa’atalitali i le Ali’i, e toe fa’afouina lo latou malosi; latou te si’i ae apa’au e pei o aeto; latou te femoei, a e le vaivai; latou te savavali, ae le tigaina (Isaia 40: 29, 30, 31).

O le vaitau o le Fagafulu ua vala’auina i tatou ina ia tu’u atu o tatou fa’atuatua ma fa’amoe-moega i le Ali’i (cf. 1 Peteru 1: 21), ona afai e tu’u atu le tatou va’ai i le Keriso toetu o le a mafai ai ona tatou tali atu i le apili a Aposetolo, “Aua ne’i fa’apalapala i le amio lelei (Kalatia 6: 9).

Aua ne’i o tatou fa’avaivai e tatalo. Na a’oa’o mai i tatou e Iesu “ina ia tatalo so’o e tatau ai, ae aua le fa’avaivai (Luka 18: 1). E mana’omia ona tatou tatalo ona tatou te mana’omiaina le Atua. O le manatu tatou te lē mana’omiaina se isi mea ua na o tatou lava o se manatu sesē toe mata’utia. Afai o le fa’ama’i o lo’o pipisi nei ua fa’ateleina ai o tatou manatu i o tatou tagata ma o tatou vaivaiga, ia avea lenei Fagafulu tatou te iloaitino ai le fa’amafanafanaga ua aumai i le fa’atuatua i le Atua, e aunoa ma ia e lē mafai ona fa’atumaui ai i tatou (cf. Isaia 7: 9).

E leai se isi e ausia na o ia le fa’aolataga, ona o tatou uma o lo’o faimalaga i le va’a e tasi, i le i ai o afā o le tala’aga; ma e mautinoa lava e leai se isi e taunu’u i le fa’aolataga e aunoa ma le Atua, ona ua na o le misitelio fa’apaseka a Iesu Keriso e manumalō i vai pogisā o le oti. O le fa’atuatua ua lē ave’esea ai avega mamafa ma fa’afitauli o le olaga, ae ua mafai ai e tatou ona feagai atu i ai i le fa’atasiga ma le Atua ia Keriso, fa’atasi ai ma le fa’amoe-moega tele e lē maua ai se fa’anoanoaga, o ana folafolaga o le alofa lea ua sasa’a mai e le Atua i o tatou loto e ala i le Agaga Pa’ia (cf. Roma 5: 1 – 5).

Aua ne’i o tatou fa’avaivai e lia’i i luga a’a o le leaga. Ia avea le anapogi ua vala’auina ai i tatou e le Fagafulu e fa’amalosia ai o tatou agaga mo le taua aga’i atu i le agasala. Aua ne’i o tatou fa’avaivai e togisala ma le salamō, ma le iloaina e lē fa’avaivai le Atua e fa’amagalō. Aua ne’i o tatou fa’avaivai e tete’e atu i le tu’inanau o le tino, o lenā vaivaiga ua fa’aosoosoina ai le manatu iā oe lava ma faiga fa’atiapolo uma, ma maua ai i vaega uma o le tala fa’asolopito o auala ‘ese’ese e fa’aosooso ai ali’i ma tama’ita’i i le agasala. Se tasi o lenei, o le fa’avaisū lea i

vaega fa’atafa’ilagi, ua fa’aleaga ai le va fealoga’i o tagata. O le Fagafulu o se taimi agalelei e tete’e atu ai i nei fa’aosoosoga ma fa’alelei atili ai mafutaga ma feso’ota’iga, i le feagai ai fa’aletagata.

Aua ne’i o tatou fa’avaivai e faia le lelei i galuega o le alofa aga’i i o tatou tuā’oi. A o tatou i ai lenei Fagafulu, ia tatou fa’atinoa le lima foa’i i le avatu ma le loto malie (cf. 2 Korinito 9: 7). O le Atua “o lē ua foa’i tele mai fatu saito i lē ua lulū ai (2 Korinito 9: 10) ua mafai ai e tatou ta’ito’atasi, e le gata ua maua mea e ‘ai, ae fa’apea le agalelei i le faia o lelei i isi. Atonu e moni o lo’o i ai o tatou olaga atoa e totō ai le agalelei, ae tatou fa’aogaina lenei avanoa fa’apitoa o vaitau o le Fagafulu e tausi ai o tatou aiga ma uō ma a’apa atu i uso ma tuafafine o lo’o ta’o’oto ma manua’aga i le ala o le ola (cf. 10: 25 – 37). O le Fagafulu o se taimi tāua e sa’ili atu ai – e lē o le ‘alofia – latou ua i ai le mana’oga; ‘a’apa atu - ma ‘aua le lē amana’iaina – latou ua mana’omia se fa’alogo alofa ma se upu lelei; e asiasi – ae ‘aua le tu’ua – latou ua ta’ito’atasi. Ia tatou fa’atinoa la tatou vala’auina ina ia faia le lelei i tagata uma, ma fa’asao se taimi e alofa atu ai i e matitiva, latou ua tia’ia ma te’ea, latou ua fa’ailogaina mai le taufa’asi’usi’u o le sosaiete (cf. Fratelli Tutti, 193).

#### AFAI TATOU TE LE FA’AVAIVAI, O LE A TATOU SELESELE A TATOU SELESELEGA ILE TAIMI TATAU

I tausaga ta’itasi i taimi o le Fagafulu ua fa’amanatu mai ia i tatou o le “agalelei, fa’atasi ma le alofa, fai meatonu ma le lotogatasi e lē ausia i se taimi e tasi mo le to’atele; e tatau ona iloaina i aso ta’itasi. Ia tatou talosaga atu i le Atua e foa’i mai le onosa’i tutumau a le faifa’atoga (cf. Iakopo 5: 7), ma fa’asoaina i le faia o le lelei, i se fa’asologa lelei. Afai tatou te pa’u’ū, ia a’apa atu o tatou lima i le Tamā o lē e masani ona si’i i tatou i luga. Afai ua tatou leiloa, pe ta’iina sesē fo’i e ni fa’aosoosoga a le tiapolo, ‘aua ne’i o tatou toe fa’atali e toe fo’i atu i le Atua, “auā na te matuā fa’amagaloina” (Isaia 55: 7). I lenei vaitau o le fa’aliliuga, fafagaina e le kalasia a le Atua i le ‘au ai fa’atasi a le Ekalesia, ia ‘aua ne’i o tatou fa’avaivai i le faia o le lelei. Ua saunia le ‘ele’ele i le anapogi, fa’asūsū e le tatalo ma fa’aolaolaina e le alofa. Ia tatou maumaututū “afai tatou te lē fa’avaivai, o le a tatou selesele le seleselega i

## FE'AU A LE TAMĀ PA'IA MO LE FAGAFULU 2022

le taimi tatau (Cf. Eperu 10: 360), mo lo tatou fa'aolataga ma le fa'aolataga o isi (cf. 1 Timoteo 4: 16). I le totōina atu o le alofa fa'aleuso i tagata uma, ua tu'ufa'atasia ai i tatou ia Keriso, o lē na foa'i lona ola mo tatou, ma foa'i mai se mua'i tofo i le olioli i le malō o le lagi ina ia pule aoao le Atua i le aoao o mea uma.

Ia aumai e le Taupou o Maria, o lē na tauave le Fa'aola i lona manava ma “mafaufau ai i lona loto” (Luka 2: 19) le mealofa o le onosa'i. Ia fa'atasi mai ma i tatou lona tagata fa'atinā, ina ia avea ai lenei vaitau o le fa'aliliuga e maua ai ni fua o le fa'aolataga.

## SAGATA MARIE O EUGENE A IESU - (1817 – 1898)



O SAGATA Ana Marie Eugenie Milleret na fanau i Metz, i Farani. O lona tamā sa faigaluega i le faletupe. O lona tinā na avatua i ai se a'oa'oga na fa'amalosia ai lona tagata ma avatu i ai se manatu malosi e uiga i matāfaioi ma tiute. O le olaga fa'aleaiga na tuputupu a'e ai lona atamai fia su'esu'e ma le agaga ilitata, se tului i fesili tau sosaiete ma se malamalama laua'itele o le lalolagi.

E pei o isi tamaiti Katoliko, sa au ai i Misasa i aso o sulufaga ma talia sakalameta o le fa'aulufalega, ae aunoa ma se taumaūga. O lona ulua'i komunio o se va'aiga fa'alilolilo.

O se tuputupu a'e fiafia i lona la'ititi na 'aafia i le maliu o lona tuagane matua ma se uso pepe ma o ia lava fo'i sa tulaga taufa'aletonu. Sa iloa feagai atu i mea e tutupu. Ina ua fa'aletonu le fale tupe a lona tamā ma tete'a ai ona matua ma tofu ai le matua ma le tamaitiiti, o Eugenie na malaga atu i Paris ma lona tinā, na maliu ina ua 15 o ona tausaga.

Ina ua 19 ona tausaga na feiloa'i atu ia Abbe Lacordaire o lē na fa'aosofiaina o ia ma fa'atupulua ai lona fa'anaunau e tu'u uma atu lona malosi i le Ekalesia, sa ia va'aia o lo'o umia le ki tatala i le

tomai ma mauaina o mea uma e lelei. O le isi a'oa'o, Patele Cambelot, na maitauina le agaga i lenei tama'ita'i talavou ma fa'atauina iā te ia i le 22 o ona tausaga, e fa'avaeina le Ituaiga o le Assumption, fa'a'au i le fa'apaiaina o latou olaga i le fa'auuaina o le malō o Keriso iā i latou lava ma le lalolagi. I le tausaga 1841, na tatala aloa'ia ai le latou ulua'i a'oga.

O Marie ma le latou ituaiga sa manana'o e tu'u fa'atasia 'oa fa'aleagaga mai taimi ua tuana'i a le Ekalesia ma se ituaiga o olaga fa'alelotu ma a'oa'oga ua mafai ai ona fa'amalieina ai mana'oga o mafaufauga i aso nei. O la latou fa'aleagaga, fa'a'au iā Keriso ma le Liutino, e loloto tomanatuga ma tu'utō i gaoiga a aposetolo, ua avatu i le sa'iliga mo le Atua ma le alofa ma le 'au'aunaga i isi. Ole mealofa a le sagata o le fa'auō na mafai ai ona fa'aosofiaina le to'atele o tagatā lotu e galulue fa'atasi ma ia.

O tausaga fa'ai'ui'u o lona olaga, na fa'alogoina e Eugenie le sau o le vaivai fa'aletino sa ia tauave ma le fa'aaloalo ma le leai o se leo – o se olaga ua tu'uina atu atoatoa iā Keriso. Na maliu o ia i le aso 10 Mati i le 1898

O nei aso o lana ituaiga ua galulue nei i atunu'u e 34 le aofa'i.

O Sagata Marie Eugenie, fa'aosofia i tatou i taimi uma e sa'ili le Atua e ala iā tatou gaoiga.

# O LE TATALO A LE ALI'I – I SE LALOLAGI O LE KOVITI

**Lo Matou Tamā e o i le Lagi** – Ua matou vaivai ma le lē aogā e aunoa ma lau fesoasoani.

**Ia Pa'ia lou suafa** – ua matou vala'au i lou suafa ma punonou ifo ma fa'aloaloa atu o matou lima. O le pa'iaga o au foafoaga ua lamatia a o le Koviti matape'ape'a ua ta'alo i olaga.

**Ia o'o mai lou malō** – O le fa'ama'i o le Koviti o lo'o fetauaiga i matou ua afuafua ai fa'alavelave ma le lē fealofani, tu'u'ese'eseina, tu'ufua ma le maliu – ua tete'e i lou malō o le malamalama ma le kalasia ma le filemū. Ia puipui i matou i ou 'a'ao alofa ina ia matou iloa ai le matagofie o lou malō.

**Ia faia lou finagalo ile lalolagi e pei ona faia ile lagi** – o lou alofa mo le lalolagi na auina mai ai Iesu iā i matou; na auala mai ai lau Upu iā i matou. E i ai taimi matou te lē fa'alogo ai. O le fa'aogaina sesē o au mealofa ua mautinoa lava na mafua ai o matou fa'aletonu. Fesoasoani mai iā i matou e usita'ia lou finagalo i mea uma lava.

**Ia e foa'i mai i le aso nei a matou mea e 'ai** – Ua fevaevaea'i i matou mai le tasi i le isi e le fa'ama'i o le Koviti, ua galala i le fia feiloa'i atu i isi ma ola fiafia i fa'apotopotoga. Fafaga i matou nei i le malamalama i le alagatatau o a matou feso'ota'iga o le tasi i le isi ma le foafoaga atoa. Ia ave la matou tausiga ma le alofa o le falaoa e fafaga ai ola uma.

**Fa'amagalo iā te i matou iā matou agasala** – Ua matou fa'aleagaina ma fa'amaumau le anoanoa'i o au foafoaga. Ua matou manatu na o matou lava. Atonu o le mafua'aga leni ua osofa'ia ai e le Koviti le tagata. Ia fafagu i matou i o matou 'ese'esega. Fa'amagalo o matou manatu fa'apito, o matou fa'atamala ma le matape'ape'a.

**E pei o i matou foi ona matou fa'amagaloina atu i ē ua agaleaga mai iā i matou** – e faigofie ona lagonaina ua agaleagaina, tu'ua'ia isi mo a tatou fa'aletonu. Ae o le fa'amagaloina o se fa'aleleiga, e mālū, filemū. Ave'ese atu ma i matou le inoino, e pei o le Koviti, ua fevaevaea'i ai ma fa'aleagaina ai. O le leai o se fa'amagaloga ua taofiofi ai le alofa.

**Aua fo'i e te ta'ia'iina i matou i fa'aosoosoga** – O le fa'ama'i o le Koviti – 19 ua fa'aalia mai ai le itū leaga o le fa'ate'a. O le faitoto'a lea o le nofo to'atasi ma le fa'atāma'ia o fa'apotopotoga. Lavea'i i matou mai fa'aosoosoga e fa'ate'a i isi, fa'aleagaina faigauō. O le mailei leni na faia e

le Koviti. Puipui mai iā i matou.

**A ia e lavea'i iā i matou mai le leaga** – lavea'i i matou, le Atua agalelei ma le alofa. Aumai i matou mai nei taimi leaga ma o matou fa'atuatua ma le alofa tele, ma se va'aiga manino i lau mealofa tāua o le ola, ma se malamalama atoatoa i au matafaioi i le lalolagi e pele iā te oe.

**Auā o 'oe e ou le malō le mana ma le vi'iga e fa'avavau fa'avavau lava.**

\*\*\*\*\*

## **Na Fa'amalosia e pei o Iesu Keriso e Sola'ese**

I le tala'aga a le Ekalesia, e to'atele Pope na ta'ua le Aiga Pa'ia pe a talanoa i le tausiga o tagata sulufa'i ma tagata faimalaga. O Pope Pio XII i lana fa'avae fa'aaposetolo, *Exsul Familia Nazarethana* (1952) sa tusia:

*O le Aiga Pa'ia o Nasareta, na sosola atu i Aikupito, o se fa'ata'ita'iga lelei o se aiga ua sosola 'ese atu mai le nu'u moni.*

Ua tosiga e Pope Faranisisi i tatou i tua i le Aiga Pa'ia ina ua fa'atalanoa mataupu tau i tagata faimalaga ma tagata sulufa'i. Sa ia fa'atusa tulaga na o'o i ai le Aiga Pa'ia ina ua sosola atu i Aikupito i le malaga na faia e le anoanoa'i o tagata faimalaga ma tagata sulufa'i. E pei o le tulaga na o'o i ai le tamaitiiti o Iesu mai le fa'asauaga mai le Tupu o Herota, ua fa'amanatu mai e Pope Faranisisi iā i tatou “o le 'afa o tagata sulufa'i i nei aso i le lalolagi o tamaiti, latou na a'afia i le leai o se amiotonu o le tagata” (Pope Faranisisi 2018).

*O Sagato Iosefo ole sulufaga fa'apitoa mo latou ua tu'ua fa'amalosia latou nu'u moni ona o taua, itagia, fa'asauaga ma le mativa.*

I lana tusi fa'aaposetolo Patris Code (2020), i le fa'amanatuina o le 150 tausaga talu ona fa'avaeina o Sagato Iosefo o le sulufaga o le Ekalesia aoao na folafolaina ai e Pope Faranisisi o le Tausaga a Sagato Iosefo ma ave ai Iosefo o le “sulufaga fa'apitoa mo latou uma na fa'amalosia e tu'ua a latou atunu'u moni ona o taua, itagia, fa'asauaga ma le mativa.”

Na fa'amatala e Faranisisi Iosefo o se tagata faimalaga ona sa fa'atonuina o ia e le agelu i se miti e ave Maria ma Iesu ma sosola i Aikupito (Mataio 2: 13 – 23). Na toe fa'amausalī mai e Pope Faranisisi le loto tele a Iosefo i le fa'atuatua-

# O LE TATALO A LE ALI'I – I SE LALOLAGI O LE KOVITI

ga na tu'uina atu e le Atua iā te ia mo le 'oa aupito sili le tāua a lo tatou fa'atuatua – Iesu Keriso ma Maria lona Tinā.

Fa'atasi ma le miliona o tagata ua fa'aanu'ua nei, ua tatou va'aia ai le anoanoa'i o Iosefo i aso nei ua tu'ua fa'atasi ma aiga o latou atunu'u. E to'atele ae fa'apitoa i lenei tausaga o Sagato Iosefo, ua tatou va'ava'ai i le tamā fa'alalolagi nei a Iesu o se fa'ata'ita'iga o le fa'atuatua ma le loto tele atoatoa.

O le Caritas Fa'alalolagi ua Fa'asoaina le Faigamalaga

Ia Setema 2017, o le Caritas i Malō a le lalolagi na fa'avaeina se taumafaiga fa'alalolagi nei i le aganu'u o le feiloa'iga i le tulaga i femalaga'iga fa'alalolagi, ua fa'aigoaina *Fa'asoa le Malaga* (Share the Journey - STJ). I le fatu o lenei mataupu (STJ) le vala'au a Pope Faranisisi ina ia fausia se aganu'u o le feiloa'iga. O le autū o lenei mataupu mo vaega o le Caritas i le lalolagi atoa, e a'afia ai le Caritas a Aotearoa Niu Sila, e fa'agaioia nei taumafaiga fa'atasi ma tagata fai malaga ma latou na ave ma tagata sulufa'i e fa'amalosia le feso'ota'iga ma tagata. O lenei taumafaiga mo le 4 tausaga na fa'atupu teleina ai le fa'amoemoe ma le avanoa o le mafutaga mafana ma tagata fai malaga ma le tagata sulufa'i.

## O LE TATALO O LE TA'UTINOGA O LE FA'ATUATUA

### *NAISIA/NICENE*

O le tatalo o le fa'atuatua na fa'aliliu mai le upu Peretania – '*Creed*'. O le upu lenei sa sau mai le upu Latina *credo*, o lona uiga i le fa'a – Samoa '*ou te fa'atuatua*'. O le mea lea o lenei tatalo o le tu'ufa'atua o fa'atuatua. Aemaise lava i le ulua'i selau tausaga i le mae'a o le maliu o Keriso, sa feagai atu le ekalesia ma fa'afitauli o le 'ese'esega o manatu ma taofi i mataupu e pei o Iesu o le Atua moni ma fa'apea le fesiligia pe e iā ia le natura fa'aletagata ma le natura mamana. Mai ia finauga na faia ai e le ekalesia ni fa'amatalaga o le fa'atuatua, i nei aso ua fausia ai se vaega tāua pe fa'apefea i kerisiano ona

fa'aalia lo latou fa'atuatua. Se'i o tatou va'avaai i nei tatalo tāua ua aumaia se fa'apu'upu'uga o le talitonuga Kerisiano.

## O LE FA'ATUATUA O APOSETOLO/APOSTLES' CREED

O lenei tatalo e masalomia o se tasi o ulua'i tatalo na fa'aogaina i le Fa'akerisiano i aso nei. O le igoa na sau mai le tala'aga o apositolo e toasefululua a Keriso na faia lo latou sao i vaega pu'upu'u ma o a'oa'oga, e ui o le vaega na muamua atu ua fa'apea e mai le c.215. O le tatalo ua manino mai ai se fa'aupuga o le talitonuga Kerisiano ma fausia ai le fa'avae mo tatalo na mulimuli mai ai. Ua aumai ai a'oa'oga "i le mamalu faigofie (mamalu), i le lē mafa'atualia (matagofie), i le fa'asologa matagofie ma le sauniga mamalu (pa'ia)"

## O LE TATALO NAISIA/NICENE CREED

O le fa'ailoga o le fa'atuatua ua fa'aoga laua'itele i sauniga Kerisiano ua ta'ua o le Naisia ona na mua'i fa'aogaina i le taulaga o Naisia e le Ulua'i Fono a Naisia i le tausaga 325. O se fa'amatalaga ole fa'atuatua ma na o le pau lea o le Tatalo a ekalesia tu'ufa'atasi ona ua fa'aogaina e Katoliko Roma, Ekalesia i Sasa'e, Egelani, ma Porotasano Autū.

O le Tatalo Naisia e masani ona fa'aogaina e Kerisiano. Mulimuli mai ai na toe Iloilo e le Fonotaga i Constantinople i le tausaga 381. I lenā taimi o lo'o tauivi le ekalesia ma a'oa'oga sesē Arian, na tineia o Keriso o le Atua moni lea, ae fai mai o se tagata na foafoaina. Na toe faia fa'alelei e te'ea ai le mau Arian ma fa'amatala manino lelei mai ai o Keriso e fa'avavau ma o le vaega o le tasilolu pa'ia o le Tamā, Alo ma le Agaga Pa'ia.

I lālā uma o le Fa'akerisiano, o lenei tatalo o lo'o fa'aogaina i aso nei. Mo se fa'ata'ita'iga, i Misasa ta'itasi uma a le Ekalesia Katoliko Roma, ua fa'aogaina o le ta'utinoga o le fa'atuatua.

## TOE FA'AFΟΥGA MAMANA - I TUA ATU O PALISI

### O LE UTE O LE FA'AMOEMOE - (FA'AAUUAU MAI LOMIGA TALU AI)

Na tu'uina mai e Pope Faranisisi se tasi o fa'aupuga pule fa'alalolagi nei i tausaga ua tuana'i i lana tusitusiga o le *Evangelii Gaudium* (Le Fiafiaga o le Evagelia):

Ou te moe miti i se "i si faiga fa'amisionare" o lona uiga, se fa'alogo'aga fa'aosofiaga e mafai ai ona suia mea uma, ina ia avea ai aganu'u a le Ekalesia, o auala e faia ai mea masani, o taimi ma fa'atulagaga, gagana ma fausaga e mafai ona fa'aalu mo le fa'aevageliaina o le lalolagi i aso nei i lo le taumafai e tau fa'asaoina o ia lava.

O lenei fa'amatalaga e t'aua ona ua pu'epu'eina ai le miti a Pope Faranisisi – ma o miti e fa'aosofiaina. I le 1963, ina ua tu Martin Luther King Jr. i luma o le ma'a fa'amanatu o Lincoln ma lauga atu ia i latou na o atu e 'au ai i le Savaliga aga'i atu i le taulaga mo Galuega ma le Sa'olotoga, e le'i fai mai, e i ai lo'u manatu," po'o "e i ai la'u fuafuaga" po'o "e i ai la'u lisi o mea e tatou ona fai." Sa ia fai mai, "E i ai la'u miti!"

O taimi uma tatou te talanoa ai i miti, ua tatou talanoa i le gagana o le va'ai mamao, ma o le va'ai mamao e t'aua ma tatau. O se va'aiga mamao malosi e lē na ona fa'aosofiaina; o lo'o ta'ita'ia i se aga'i i luma: O le mea lea e mafai ona tatou ausia! E mafai ona avea i tatou ma mea ia! E fa'amalosi'au, e fa'aolaola, ma e masani e maua i ai lagona fiafia ma le lelei.

A tatou fa'alogologo lelei i le miti a Pope Faranisisi, ua tatou va'aia ai se suiga atoatoa toe faigatā. A talanoa mai e uiga i "lagona fa'aosofiaga fa'amisionare e mafai ona suia ai mea uma," e lē na ona talanoa mai e uiga i talitonuga i olaga palisi, ae o lo'o talanoa mai pe fa'aapefea ona tatou ola ma fa'aapefea ona tatou faia ni mea maumaututū.

O a tatou palisi e i ai faiga masani ma polokalame – ma e masani tatou te lē manana'o i nisi e suia faiga ma polokalame ua tatou masani ai. O se fa'ata'ita'iga, sa taumafai la outou faife'au e suia taimi o a outou Misasa? O le mea moni lava tatou te talanoa e uiga ia tatou palisi o fa'apotopotoga, o so'o fa'amisionare, ae masani ua na o ni fa'apotopotoga o ni tagata fa'atau mea tau talitonuga.

O se tasi nei o lu'itau tele ua feagai ma i tatou pe a feagai ma ni fa'afouga ma ni suiga o palisi ma pule'aga. Ua tatou taofiofi mamau i faiga ma auala ua tatou masani ai. Tatou te manana'o i o tatou lava taimi ma polokalame. Tatou te taofiofi

ia tatou fausaga ma gagana. A tatou va'ava'ai i mea o lo'o tatou faia o ni palisi ma pule'aga, e mafai ona fa'apea o nei mea ua sili atu le t'aua ia i tatou i lo'o le fa'aevageliaina o le lalolagi i aso nei. Ua lē afaina po'o le ā la tatou mau fa'atala'iga, o tala mai upega fa'atafailagi po'o tusitusiga mai niusipepa. A va'ava'ai i mea o lo'o tatou faia ua manino lelei mai ai a tatou tulaga o le fa'at'auaina.

O lona fa'atumutumuga lava – afai ua tatou taumauga atoatoa i le toe fausaga, o suiga, ma fa'afouga – o le va'ai mamao o lo'o ta'oto i le fatu o mea ua tatou faia. Va'ai mamao e tu'itu'i atu i le fa'anaunauga; e fai ma pā puipui o ta'ita'iga a se fa'apotopotoga i se palisi po'o se pule'aga, po'o le Ekalesia āoāo. O le va'ai mamao ua mafai ai ona tatou gaiioi atu i se isi taunu'uga; ua fausia ai se āta o se lumana'i malosi ma le alualu lelei. O se fa'anaunauta'iga ua fa'aosofiaina e le va'ai mamao, ae ui i lea, ua i luga o se mea e sili atu lona fa'afa'avaeina – o le fa'amoemoe.

O le Fa'amoemoe o se tasi lea o vituti e tolu ai vituti fa'atelosia, o le isi lua o le fa'atuatua ma le alofa. A lē lava le fa'amoemoe, ua leai so tatou fa'anaunauga. Ua maua tatou i le masalosalo, le lē fiafia ma le fa'anoanoa. O le fa'amoemoe e t'aua tele i le olaga Kerisiano. E pei ona tusia e Sagato Paulo i le Ekalesia i Roma: *O le Atua fo'i e tupu mai ai le fa'amoemoe, ia fa'atutumuina outou e ia i le olioli uma atoa ma le filemu, ina ua fa'atuatua; ina ia tele lava lo outou fa'amoemoe ona o le mana o le Agaga Pa'ia* (Roma 15: 13).

Afai o le a tatou una'ia aga'i i luma lenei galuega o le tala'iga ma le fa'afouga, e tatau ona tatou amata i le moni o le ofoofogia o le fa'amoemoe. O le fa'amoemoe Kerisiano o lo'o mau a'a i le Atua na toe fa'atuina mai Iesu Keriso mai le oti; ua mafai ai ona tatou tutū i luma o le koluse i le Aso Faraile Pa'ia ma mo'omo'o mo le Aso Sa o le Eseta.

I le feagai ai ma le oti ma le to'ilalo, o tatou fa'amoemoe e lē fa'aitiitia, ona o le Tasi na aumaia vai tafe mai le toafa e mafaia ona aumaia ni vaitafe o le ola mai o tatou loto. O ia o le Atua o le fa'amoemoe, ma e ala mai le mana o le Agaga Pa'ia ua tatou taliaina ai lenei fa'amoemoe, ua aumaia fa'atasi ai le agava'a mo le pasio ma le agava'a e moe miti ai.



## TOE FA'AFΟΥGA MAMANA - I TUA ATU O PALISI

### O LE UTE O LE FA'AMOEMOE - (FA'AAUUAU MAI LOMIGA TALU AI)

O le fa'amoemoe e i ai le malosi'aga e va'ai ai i le āta atoa, va'ai i le moni e pei ona i ai, i le lelei ma le vaega e lē lelei. O le vituti o le fa'amoemoe ua tatalaina 'ese ai noanoatia o le tineia e pupula to'a atu ai i foliga o le moni, ma le mautinoa o le Atua e faia ni mea fou, e ui o mea o le a ia faia e lē mafai ona ilogofie.

#### **Fa'amoemoega i le Feagai ai ma Fuainumera**

O le a tatou talanoa i se taimi mulimuli e uiga i ituaiga o mea ua tatou fuaina. E moni o le fuaina ua sili atu le fesoasoani i isi i lo nisi. O se amataga masani o le sa'ilia lea o numera o tagata e 'au ai i saunigā lotu. E lē o se fua tāua tele lea, ae o se amataga. O le tauiviga, e ui i lea, o su'esu'ega 'ese'ese ua fa'ava'a ai le fesili i auala 'ese'ese. O lo'o i ai se mataupu o le 'au ai i sauniga ma le feso'ota'iga fa'anatura i nei fuainumera.

O se fuainumera e sili ona faigofie ona fa'aogā e fa'atusatusa ai le feso'ota'iga fa'anatura a le Ekalesia i atunu'u 'ese'ese o le pasene o Katoliko e 'au ai i Misasa i le vaiaso. E lē gata e i ai lona tautua aogā, ae ua tatou amataina ai fo'i se fa'amoemoega maualalo o le uiga o le avea ma Katoliko fa'atuatua. Lona lua, po'o le ā lava le pasene o latou e 'au ai i Misasa e masani lava ona maua ma nisi fa'atusatusaga i nisi fo'i faiga. Mulimuli lava o su'esu'ega e fa'avae i fa'amaumauga ua maua mai. E tāua tele i aso nei ona o suiga i le tele o atunu'u i nei vaitau. O le tauiviga ma le fa'aitiitia ua lē na o se mataupu tau i Katoliko. Atonu ua tula'i mai ai ma se fesili po'o le a le taimi e o'o mai ai le vaega o le fa'amoemoe. Ona o tatou o Kerisiano, e i ai o tatou fa'amoemoe – e anoanoa'i o tatou fa'amoemoe. Aiseā? Ona tatou te fa'atuatua i le Atua soifua, ma ona o a tatou pule'aga ua tapenaina ni fuafuaga mo lenei moni.

E lē mafai ona tatou 'alo'ese mai lenei moni. Vaganā ua lava le va'ai mamao, tapenaga, ma le galue malosi, o fa'amoemoega Kerisiano o le 'a o'o i ni fa'anoanoaga.

Va'aia i mata o le fa'amoemoe, e ui i lea, o nei fuainumera ua avea ma se avanoa, se vala'au manino mo le Ekalesia ina ia ola ai lana fa'asi-nomaga fa'aevagelia ma lana tala'iga.

#### **Tauiviga ma Temonio o le To'ilalo**

O le fa'amoemoe o lo'o mau a'a i le moni o le kalasia a le Atua na manumalō i le tu'ugamau, fa'aleagaina le malosi a le agasala, ma fa'atoetui-

na mai Iesu mai le maliu. O lenei Iesu ua ofoina mai le ola mamana i le lalolagi e ala i le Ekalesia. O lona uiga ua iā i tatou le fa'amoemoe, o se fa'amoemoe mae'ae'a Kerisiano. O la tatou Atua o le Atua o le manumalō! Na fa'ailoa mai e Pope Faranisisi lea vaega i le *Evangelii Gaudium*:

#### ***O se tasi o fa'aosoosoga mata'utia***

*O se tasi o fa'aosoosoga matuiā ua taofia ai le loto tele ma le ma'elegā o le to'ilalo ma le maoa'e o le lē fiafia ma tagata lē talitonu, loto ma'a'a. E leai se tagata e aga'i atu i se taua vaganā ua mautinoa e manumalō mai ai.*

Ua tatou iloina lelei lenei: afai tatou te lē fiafia pe lē āno i isi, afai ua leai se fa'amoemoe ma avea o ni tagata ua to'ilalo, o le lumana'i ua tele lona fa'aletonu. E tele mafua'aga e leai ai se fa'amoemoe; o le tigā e o'o mai pe a tatou taumafai e ta'ita'ia isi mai nisi. Afai fo'i e te taumafai e fa'aofi mai ni mea fou e te iloina lelei lava le tete'e. O le a faifai tagata iā te 'oe. O le natura lava o le taumafai e 'alo 'ese mai nei faiga tigā ma le mafatia.

O le lēlavā e mafai fo'i ona mamulu atu ai le fa'amoemoe. A tele mana'oga mai le palisi e mafai ai ona maua i le vaivai ma le lēlavā e i'u ona maua i le lofituina ma mafaufau ai pe mafai ona tatou faia ni suiga. So'o se isi lava e tauavea so'o se ituaiga o 'au'aunaga e mana'o ia fua mai ni fua lelei. A va'aia a tatou galuega lelei ma le fitā ua fua mai ni fua lelei, ona tatou mālōlō lea i lea aso ma le fiafia.

O le olaga fa'apalisi, e ui i lea, e masani ona avea ma masani agalelei o le tausiga o le olaga fa'apalisi, ae afai o le tausiga ua avea ma i'uga ma e masani ona tatou fa'agaloina le tala'iga, ona avea lea o palisi o se ituaiga o mālō fa'alelotu. Tatou te avatu, ma avatu, ma avatu, ma e ave ma ave ma ave. O le ituaiga o lēlavā lenā e fa'avaivai loto. E maua ai i le lēlavā ma le loto vaivai, ma e ave'ese atu ai ma le fa'amoemoe mai iā i tatou mo le lumana'i.

O le lē fiafia o le isi fili lea o le fa'amoemoe. O le upu i lona fa'auigaina mai lona amataga o le sa'oloto mai i le leai o se fiafia. I lona fa'aogaina i nei vaitau, o lona uiga o le ave'eseina lea o lou mafai ona miti. I se isi fa'aupuga o le lē fiafia ua maua'a i le moni a o latou ua lagonaina ua latou lē mafai ona va'ai i tua atu o le moni. I le lē mafai ona foafoaina se isi mea e mafai ai ona gaiioi i tua atu o se isi itū, ua mamulu atu le

## TOE FA'AFΟΥGA MAMANA - I TUA ATU O PALISI

### O LE UTE O LE FA'AMOEMOE - (FA'AAUUAU MAI LOMIGA TALU AI)

fa'amoemoe.

Masalosalō o le isi lea fili o le fa'amoemoe. O le to'atele o tatou sa tauivi ma lenēi i o tatou olaga, ma ua tatou va'aia le to'atele o ta'ita'i o le Ekalesia – tiakono, ositaulaga, ma epikopo – o tauivi ma lenēi iā latou 'au'aunaga. Mulimuli ane, o le masalosalō o se ituaiga o atamai ua ave'ese ai le fa'amoemoe. O le masalosalō e mata'itū i le malosi o le fa'afitauli ae lē o se avanoa mo se tali po'o se i'uga lelei. O le togafiti e uiga i le masalosalō: e lē gata e taumafai e fa'aleaga le fa'amoemoe i lou loto, ae e taumafai fo'i e fa'aleaga le fa'amoemoe i so'o se mea lava. E mafai e le masalosalō ona iloaina le i ai o le fa'amoemoe i isi ma o le a taumafai e tineia lea fa'amoemoe pe a ia mauaina. O le masalosalō e moni ma o se fa'ama'i i totonu o le Ekalesia, aemaise lava le to'atele o latou e mau tofi.

O le fili mulimuli o le fa'amoemoe e fia fa'ailoa atu e uiga 'ese lava: lotomalie. O le lotomalie e va'ava'ai i le moni o tulaga ua tatou i ai i le taimi nei ma fa'apea mai, "e lē o afaina lava a'u i le fa'aitiitia ma fa'amaumauga. O lo'o lelei lava a'u i le tausiga o tagata mama'i, e lē na o tagata palisi ma pule'aga ma isi mea fai.

E masani o le fa'anaunauga ina ia olaola mai palisi i tulaga fa'aletonu o lo'o i ai. E faigatā ona lagonaina le lē fiafia pe afai ua fa'aosofiaina lou loto e le lotomalie. O le lotomalie i tulaga o lo'o i ai nei le tatou Ekalesia o le fa'amata'u sili lea i le fa'amoemoe mo le lumana'i, ae afai e leai so tatou fa'amoemoe, e masalosalō e leai se lumana'i.

### Fa'amaoniga Ola

A mafai ona tatou tautua i la tatou Ekalesia ma ona tagata ma le agaga o le fa'amoemoe, pe afai tatou te fa'atuatua i mea ua mana'o i ai le Atua mo lona Tino, ona tatou amata lea i le ala o le fa'afouga – o se ala e mafai ona ta'ita'ia i ni suiga moni ma le umi. E pei ona tusia e Paulo, *O le fa'amoemoe fo'i e lē mā ai, auā ua fa'amaligi mai le alofa o le Atua i o tatou loto e le Agaga Pa'ia ua foa'iina mai iā te i tatou* (Roma 5: 5). Ua fa'amanuaina i tatou ile molimauina o fa'afouga i le tele o palisi i le tele o pule'aga i le lalolagi. O lo'o va'aia e le tele o palisi ni suiga maoa'e. O olaga ua suia ua fua mai ai le fuainumera o so'o fa'amisionare. O nei palisi ua patipatia tala o suiga; ua latou va'aia tagata ua 'au ai i 'au'aunaga; o fa'apotopotoga Kerisiano moni ua fa'avaeina; tapua'iga ma sakalameta ua va'aia le olaola. O nei fo'i palisi ua va'aia le suiga tele i le lima foa'i.

E to'atele nisi o tatou na ola ai i ni suiga fa'ape nei ma tatou te iloaina o suiga e mafai ona fai – e lē gata i le fa'atelosia, e lē na o se manatu, ae fa'atulagaina moni ma tagata moni. Afai e mafai ona faia e le Atua ma tagata ua fa'aletonu ma le vālea i 'a'ai laiti, e mafai e le Atua ona faia i so'o se mea. Ae ia muamua ona tatou fa'amaopo mai le fa'amoemoe, moemiti i ai ma vala'au i o tatou tagata i se va'ai mamao e mafai ona fa'agaioi ai i latou...*fa'aaauu pea...*

10

## O LE FA'AMATELAINA – VAITAIMI O LE FAGAFULU

O le Aso Sā muamua lenēi o le vaitausaga e tala'i atu ai e le Ekalesia, mo le nofo mafaufau i puapugā aemaise i le maliu tigā o Ieau. E pei ona apoapoa'i mai ai Sagato Paulo ia tatou faia. Afai ua avea i tatou ma suli moni o Iesu Keriso ia tatou iloa ai ona mulimuli atu iā te ia i ona tulaga vae. O le mea fo'i lea sa mimita ai Paulo i ona puapugā.

O le Evagelia o lenēi Aso Sā, ua talatalaina mai ai le tasi amio Atua na faia e Iesu i aso na amata ai lana galuega i le lalolagi. O le amio Atua, lea ua poloa'iina mai ai e le Ekalesia: O le nofo fa'amatelaina o le tagata i aso ua tofia e fa'amatelaina

ai. Ua fa'apea upu o le Evagelia: 'Ua fa'alāina o ia i po e fagafulu ma ao e fagafulu, mulimuli ane ona fia taumafa ai lea o ia (Mataio 4: 22).

### TATOU MAFAUFAU I MEA NEI:

O le aogā o le fa'amatelaina.

O le uiga o le fa'amatelaina, ma fa'atatau o upu ia e lua ma mea na faia e Iesu.

### O LE AOGĀ O LE FA'AMATELAINA

Na fa'amatelaina Iesu, ona o le fia fa'asino le ala e tatau ona tatou savavali ai, ae le'i lavea o ia i lenā

## O LE FA'AMATELAINA – VAITAIMI O LE FAGAFULU

Tulafono. Fai mai Sagato Aukusitino: 'O lo tatou Ali'i o Iesu, ua pei o se foma'i e muamua ona inu o ia i le vai ae mulimuli ona tu'u atu i le tagata ma'i, ina ia fa'amalosia lona loto'.

Ua aogā le fa'amatelaina i le fa'aletino. O le gula ma le 'ai vale, o le onā fo'i, o agasala ia e tupu ai le vaivai o le tino. A o le fa'amatelaina e malosi ai le ola o le tagata. Fai mai ai le au popoto: Ua sili ona ola umi tagata ua latou 'a'ai ma le fa'au- tauta. A o le itū fa'aleagaga e pito aogā i ai le fa'amatelaina. O le fa'amatelaina e fai ma mea e taofi ai le to'asā o le Atua, ma fa'amaui ai lo tatou nofo sala.

O le fa'amatelaina e tupu ai le ola o le agaga. Fai mai le Tusi Pa'ia – Mataio 17: 20 – 21: Ona fetalai atu lea o Iesu iā te i latou, 'Ona o lo outou lē fa'atuatua; auā e moni, 'ou te fai atu iā te outou, afai e tusa lo outou fa'atuatua ma le fua o i sinapi, e fai atu outou i lenei mauga, alu atu ia oe i le lā mea; ona alu atu ai lea; e leai fo'i se mea tou te lē mafaia. Aua na o le tatalo ma le anapogi e o 'ese ai mea fa'apena. Fai mai Sagato Ioane, 'Ou te fasioti i lo'u tino, nei fasiotia ai lo'u agaga.

O le fa'amatelaina ua pei o se aupā, e puipuia ai lo tatou ola fa'aleagaga; o le fa'avae fo'i o tu lelei ma vituti, aemaise, o le loto mamā. Fai mai Saga- to Atonio ma Sagato Paselio: Na fa'aunu'ua i tatou ai le lagi ona ole fua o le la'au ua tago i ai le tagata, tatou te toe ulufale atu i ai i le ala o le fa'amatelaina.' O le fa'amatelaina na amiotonu ai nisi e to'atele o 'au'auna a le Atua. E i ai tagata anamua e pei o Mose, Elia, Iutita, Esera, Sagato Ioane le Papatiso, le au aposetolo, e fa'apea fo'i tagata o le Feagaiga fou, e i ai Sagato Falaniko Asisio, Sagato Maletino, Sagato Kalolo ma nisi.

### O LE UIGA O LE FA'AMATELAINA

O le uiga ole tulafono lea. O le Ekalesia ua na po- loa'i i le fa'amatelaina i nisi aso o le tausaga, aemaise i le vaitausaga lea ua tatou i ai nei. O lo- na finagalo ia tatou faia ni mea fa'atigā i o tatou tino, e fa'ato'ese ai iā tatou agasala. I le ma lenei fo'i, ia sauniuni o tatou loto mo le Paseka, le aso o le toetū o Iesu, ia tatou fasioti ai le tagata tuai a ia tatou ola i se ola fou. O le fa'amatelaina o le lē 'ai i isi mea ola, ua uiga lea upu i tagata uma lava le atamai. O le isi upu, ia tasi le 'aiga i le aso, e gata lea upu i tagata matutua ma tagata mama'i, po'o tocai'ina, ma lo'omatutua vaivai.

E sa uma mea'a'ano, fa'apea fo'i ma isi mea; ae lē sa mea suāvai ua matuā ta'ua o mea inu. Afai e

i ai nisi itū o lenā Tulafono tatou te lē malamlama lelei i ai, e ao ona fesiligia se pelepitelo. O ia fo'i e tausia Tulafono fa'ale – Ekalesia.

### O LE UIGA O LE UPU 'O LE FA'AMATELAINA.'

O le mea e fa'atigā i o tatou tino. Ua tatou faia lea mea fa'atigā ia tupu ai le salamō i o tatou loto, ia avea fo'i ia e pei o se totogi mo a tatou agasala i le Atua.

Fai mai nisi, ua faigatā nauā lenā Tulafono. Ua silafia e le Atua ma lana Ekalesia, o se Tulafono faigatā, ae ui ina o lea, o se Tulafono e tataua, auā o lona aogā e totogi ai a tatou amioteaga ua faia i luma o le Atua. E leai se aogā o le Tulafono pe a faigofie anoanoa'i. Fai mai nisi: Ua vaivai lo'u tino. Se a le mea ua e malosi ai i le alu atu pea i mea fa'afiafia o le olaga nei, i ni ta'aloga ma ni fa'apotopotoga, ma malaga e tupu ai le agasala? O le fa'ailoga lea, e te lē mana'o i le ola, ae nā o le oti.

Fai mai nisi: Ua vevela nauā le asō ona o galuega mamafa. O ni upu e te 'alo'ese mai ai le tulafono. A o le Ekalesiaq ua pei o se tinā agaalofoa na te fa'atatau ana tulafono ma le tino vaivai, ma le vevela o le aso, ma galuega a le tagata, e le'i fa'apea ona mafaufau o e na latou sosola i le vao ma fa'amatelaina i aso e tele. Silasila i le fa'atatau lelei a le Ekalesia. Na o le vaitausaga nei, ma le aso e tasi o le vaiaso tatou te fa'amatelaina ai.

E ao ona tatou fa'amalosi i le tausiga o lenā Tulafono. Ia pa'ia le fa'amatelaina. O lona uiga – ia faia ma le loto fiafia ma le loto fa'amaoni atoatoa, e aunoa ma se muimui. O lē e fa'amaoni, na te fa'aopoopo se isi tū lelei na te tausia, o se tatalo e fai. O lenā tatalo fo'i e fa'amalosi'au i o tatou loto. O le fua o le fa'amatelaina o le 'alo'ese mai le agasala. Ia e fa'amatelaina ma le loto fa'amaualalo. E fetaua'i le fa'amatelaina ma le agasala, o le fa'amatelaina o aunoa ma le alofa, e leai sona aogā.

A o latou e lē tausia lenei tulafono, ona o se fa'alavelave, ia latou sui i se isi amioga lelei latou te faia; tatalo, fai se meaalofoa, fa'alogo lelei i upu a le Atua, fa'alogo i le Misasa, asiasi i le falesā ua afio ai Iesu i le Eukalisitia pa'ia, fa'amatelaina ni tasi o itū tino e i ai o mata, taliga, laulaufaiva. Afai e te lē iloa se amio e sui a'i, ia e fesili i le Pelepitelo.

Ua tatou agasala, agasala tele fo'i, o lenei ia avea lenei vaitausaga ma aso tatou te fa'afou ai o tatou

## O LE FA'AMATELAINA – VAITAIMI O LE FAGAFULU

loto. Ia e salamō ma ia ala mai lenā salamō i le fa'amatelaina. Ia e fa'atigā i lou tino e mau ai atu ai lou toe fia agasala.

Kalolo Perez FKS  
Ekalesia Sagato Patelesio  
Wainuiomata

## SAKALAMETA

### Vaega 6 O Fa'aipoipoiga i Sosaiete Fa'aonaponei

(fa'aau mai lomiga talu ai)

I le vaega muamua o le vaitau atoa o le seneturi luasefulu o le manatu fa'asakalameta i le fa'aipoipoiga, ma ona amataga i le lalolagi Kerisiano, o lo'o tumau lava e le'i lu'itauina i le Ekalesia Katoliko. Ae ui i lea, a o fa'agasolo lea seneturi, o le natura ma le galuega a le fa'aipoipoiga ua amata ona suia. I taimi muamua, o se tiute fa'asosaiete; a o lenei o se aiā a le tagata lava ia. I taimi muamua, na ulu atu i ai ona o le usita'ia o mana'oga a matua; a o lenei ua faia ona o le alofa i le va o pa'aga e to'alua. I taimi muamua, o le alofa na fuafuaina e amata i le uma o le fa'aipoipoiga, a o lenei, ua fuafuaina e muamua mai i le fa'aipoipoiga.

O nei suiga ua atagia mai ai suiga ua o fa'atasi o le natura ma le matafaioi a le aiga. E le o se tulaga o se aiga laua'itele ma augatupulaga e tele o aiga e feola fa'atasi, o aiga e masani ua na o se toaitiiti, fa'atasi ai ma matua ma fanau e leai se so'otaga tele ma aiga potopoto. Ae peita'i o aiga na avea ma vaega fa'avae o sosaiete, le nofoaga sa ola ai tagata ma galulue ma a'oa'o ai, a o lenei o le aiga o se unite e tasi fa'asosaiete fa'atasi ai ma isi. O tagata ua galulue mamao'ese ma, fanau ua o i a'oga.

O le Fonotaga a le Vatikano II na maitauina nei suiga. O le *Fa'avae Fa'alafulemū i le Ekalesia i le Lalolagi Onaponei* na fa'a'atū atoa se mataupu i fa'afitauli ua o gatasi ma fa'aipoipoiga i olaga fa'aaiga. Ae maise lava, sa taumafai le Fonotaga e 'alo'ese mai le talanoaga e uiga i fa'aipoipoiga i tulaga fa'akonokalate po'o saisaitia fa'atulafono ae aga'i i ai i tulaga fa'aletagata ma le fa'atusi pa'ia, o se fa'alapotopotoga fa'asosaiete ma le mamana, o se maliliega i le va o tagata, o se pa'aga mafana, o

se tu'u fa'atasia o le alofa, o se fa'apotopotoga o tagata ma o se feagaiga.

E pei o isi sakalameta o tusitusiga a le Fonotaga na aumai ai se fetu'utu'una'i e fa'amalieina ai mana'oga a tagata i tulaga 'ese'ese ma fa'atasi ai ma mana'oga 'ese'ese fa'aletagata. Talu mai le Fonotaga o le telosia ma le Tulafono a le Ekalesia Katoliko ua fa'aauau pea ona alu atu aga'i i se manatu ma faiga fa'aletino fa'aletagata.

Mai le taimi o le Fonotaga i Trent, o tulaga mo le fa'aleagaina o fa'aipoipoiga sa manino lelei fa'amatalaga ma na fa'aliliuina mā'oi'o lelei. O konakalate fa'afa'aipoipoiga sa mafai ona fa'aleagaina pe afai:

O itū uma e malilie atoatoa e fa'aipoipo (lona uiga sa fa'amalosia i la'ua) se tasi o i la'ua nei sa le mafai ona fa'ataunu'uina noataga o fa'aipoipoiga (fa'ata'ita'iga ona e lē lava le malosi. O itū uma e lua e le'i mauaina le fa'atagaina mai le tasi po'o le isi e fa'atagaina ai fa'akanone lea fa'aipoipoiga (fa'ata'ita'iga pe afai o la'ua nei e latalata lava le fa'aaiga).

I nai tausaga na te'a atu nei, e ui i lea, o se komiti fa'aekalesia sa fa'amatalaina ma fa'auiaina tulaga o le soloia fa'alaua'itele, ina ia a'afia ai le mafaufau lelei e faia ai se maliliega po'o ni mafai fa'alemafaufau e faia ai se taumauga. O fesili e uiga i fa'aipoipoiga Kerisiano o le so'ota'i pea i mataupu fa'asosaiete. O fa'aipoipoiga o le a avea pea ma faitoto'a aga'i atu i le pa'iaga...*fa'aauau pea...*

### 11: 1 – 18 ‘O le fa’atonu atu a Peteru i lona alu atu i nu’u ‘ese

1‘Ua fa’alogo le ‘au ‘aposestolo ma le au uso i Iutaia ‘ua talia e tagata o Nu’u ‘ese le afioga a le Atua. 2‘Ua alu a’e fo’i Peteru i Ierusalem, ‘ona finau lea o ia ma tagata peritomeina. 3Fai mai i latou, “Na e alu i tagata e lē peritomeina, ma sa ‘outou ‘a’ai fo’i fa’atasi ma i latou.” 4‘Ona amata loa lea ‘ona folafola atu fa’asolo e Peteru ‘iā te i latou:

5“O a’u nei sa ‘ou tatalo i le ‘a’ai o Iopa. Na ‘ou iloa ai le fa’aaliga ‘ina ‘ua fa’aalia mai, o le mea pei se ‘ie lautele ‘ua tu’utu’u ifo mai le lagi i ona pito e fa; ‘ua o’o mai lava ‘iā te a’u; 6‘ua ‘ou va’ai lelei i ai ma tau manatunatu, ‘ona ‘ou iloa atu lea o manu vaefā e tata’a, ma manu fe’ai, ma mea fetolofi, ma manu felelei. 7Na ‘ou fa’alogo atu fo’i i le si’ufofoga ‘ua fa’apea mai ‘iā te a’u, ‘Peteru e, tu ia i luga e fasi ma ‘ai.’ 8A ‘ua ‘ou fai atu, ‘Le Ali’i e, ‘aua lava; auā e le’i o’o i lo’u gutu sina mea’ai e sa po o se mea e lē mamā.’ 9A ‘ua toe tali mai ‘iā te a’u le si’ufofoga mai le lagi, ‘O mea ‘ua fa’amamāina e le Atua, ‘aua ‘e te ta’ua e sa.’ 10Na faia fa’atolu lenei mea, ‘ona toe sisi a’e lea o mea uma lava i le lagi. 11I le sa tutū loa mai tagata e to’atolu i le fale sa ‘ou i ai, na ‘auina mai ‘iā te a’u mai Kaisareia. 12Na fai mai le Agaga ‘iā te a’u matou te o ma i latou, ‘aua lava ne’i toe fa’atali. Na matou o fo’i ma le au uso nei e to’aono, na matou ulu atu fo’i i le fale o Konelio. 13‘Ua tala mai fo’i o ia ‘iā te i matou i lona va’ai atu i le agelu na tu mai i lona fale, ma fai mai ‘iā te ia, ‘Inā ‘auina atu ia ni tagata i Iopa, e ‘a’ami Simona o lē ‘ua ta’ua fo’i o Peteru; 14e ta’u atu e ia ‘iā te oe ‘upu e fa’aolaina ai oe, ‘atoa ma lou ‘āiga uma lava.’ 15Na amata ‘ona ‘ou tautala atu, ‘ona afio ifo lea o le Agaga Pa’ia ‘iā te i latou, fa’apei ‘ona afio mai ‘iā te i tatou i le amataga. 16‘Ona ‘ou manatua ai lea o le afioga a le Ali’i na fai mai, ‘Na papatiso atu lava Ioane i le vai, ‘ae papatisoina ‘outou i le Agaga Pa’ia.’ 17O lea la, ‘āfai e tutusa le alofa ‘ua foa’iina mai e le Atua ‘iā te i tatou ‘atoa fo’i ma i latou, ‘ina ‘ua fa’atuatua i le Ali’i o Iesu Keriso, o ai ‘ea a’u nei ‘ou te mafaia ai ‘ona vavao le Atua?’” 18‘Ua fa’alogo mai i latou i ia ‘upu, ‘ona fa’alologo lea o i latou. ‘Ua vivi’i atu fo’i i latou i le Atua ma fai ane, “E moni lava ‘ua foa’iina e le Atua i tagata o Nu’u ‘ese le salamō e ola ai.”

### 11: 1 – 18 Ua fa’amatala atu e Peteru gaoiga a le Atua i ta’ita’i a Ierusalem

E pei ona mana’omia e Simona Peteru ni fa’aaliga tutusa se tolu e amata ai ona malamalama i fu-

afuaga a le Atua e uiga i le vafeagai a Kerisiano Iutaia i Tagata mai nu’u ‘ese, o Luka fo’i ia ua manatu e tatau o lenei tapā o Tagata mai nu’u ‘ese e fa’amatala fa’atolu. E pei o le tulaga i le liliuga/vala’au a Saulo, o le tusi tala na mua’i fa’amatala sa’o mea na tutupu (Galuega 10) ona aumai ai lea o fa’auigaga e lua o mea na tutupu i ni lauga na aumai fa’atasi, e soso’o mai ai le tasi le isi (mataupu 11 & 15).

Talu mai le taliaina e Peteru o le fa’aaloalo a tagata o nu’u ‘ese o se soli tulafono Iutaia, ma lona fa’alaua’iteleina o le fa’afou fa’amesia i le tagata o nu’u ‘ese na faia ma le fa’atagaga mai ta’ita’i o le ekalesia i Ierusalem, na alagatau le mana’oga a aposestolo mo se fa’amatalaga. O le toe tolaulauina o se mea na va’aia e Peteru mai luga o le fale o se ‘ie lautele ua va’aia ai manu vaefa o lo’o feoa’i mai ai, le amapasa mai le fale a Konelio, le asiasiga, le fa’amatalaga o mea na va’ai i ai Konelio – o nei mea uma e tutusa iā i tatou ua faitaua le mataupu 11. Ae o mea na mulimuli mai ai ua aumaia ni elemene fou se lima o le fa’auigaina.

Muamua, o le poto masani a le ‘auaiga a Konelio i la latou tali atu i le fa’atuatua i a’oa’oga a Peteru ua fa’amatalaina o se “lavea’ina” (v. 14 fa’atusa i le Galuega 2: 47). Lua, ua fa’atusa e Peteru lo latou poto masani i le Agaga Pa’ia ma tulaga na o’o i ai le au aposestolo i le Penetekoso, fa’asino manino “o le amataga” (v. 15). Tolu, o nei fa’ae’ega pa’ia a le Agaga, mo le ulua’i taimi, le uiga ua fa’amatalaina e pei ona fai mai ai Ioane le Papatiso ma Iesu “papatisoina i le Agaga Pa’ia” (v. 16; Luka 3: 16 ma Galuega 1: 5). Fa, na fa’aoga e Peteru le mea na tupu i le Penetekoso o se taimi mo ia ma le To’asefululua “ina ua fa’atuatua i le Ali’i o Iesu Keriso” (v. 17); e tusa o lo’o fa’apea mai o la latou ulua’i fa’aso’oina i le taimi o le galuega a Iesu i le lalolagi nei e le’i fa’avaeina atoatoa le fa’atuatua Kerisiano. O le fa’atuatua atoatoa Kerisiano e mana’omia le taliaina o Iesu o le Ali’i toetū ma le mealofa a le Agaga Pa’ia. Mulimuli lava, o le ‘au ta’ita’i a Ierusalem sa va’aia mea na tutupu i le taimi o Konelio e lē na o se tasi se mea na tupu ae o se fa’ata’ita’iga o le finagalo o le Atua: *E moni, ua foa’i atu e le Atua i nu’u ‘ese le salamō e ola ai*” (v. 18)...*fa’a*

Inā aso na tu'uina atu se fa'atonuga mai le Tupu o Aukusitino mo le lesitaraina i le malō atoa a Roma. O le ulua'i tusigaigoa lenei; na faia a o pulea e le kovana o Quirinius Suria. Mo lenei mafua'aga, na aga'i uma atu tagata i le taulaga, ma o Iosefo na malaga atu i Iutaia mai le 'a'ai o Nasareta i Kalilaia, e resitala i le 'A'ai a Tavita, ua ta'ua o Petele'ema, ona o se tasi o sulii o Tavita; ma fa'atasi ma ia o Maria na fa'aipoipo atu iā te ia. O lo'o tō o ia ma a o latou i ai, "ona o'o lea i le po e fanau ai o ia. Ua fanau e ia lana tama ulumatua, ua ia aui ia te ia i le 'ie, ma fa'ata'oto ia te ia i le fale manu auā latou te le ofi i le fale e tali ai malō (Luka 2: 6 – 7).

O le taimi tāua ua taunu'u ua va'ava'ai i ai le lalolagi. Ma o lenei itula, o Maria ma Iosefo na ola ile faimalaga atu, le malagasā a Aperamao, Isa'ako, Iakopo ma le pateliaka o Iosefo, o Mose ma tagata uma e malolosi tele. Sa latou fa'atalitalia le tala'aga o le Ekalesia faimalaga i le lalolagi nei.

I le ōgaoga tele o le mativa, ae fa'atasi ai ma le fa'atuatua ma le fa'amoemoe ma le alofa tele o ni a latou 'oa moni ia, o Maria ma Iosefo na ola ai i taimi uiga 'ese o le tala'aga o le fa'aolataga i se fa'atau mativa. O tulaga mai fafo atu e le tatau ona tosig'ese mai ai o ia o lē ōna mea uma lava, o ia o le mealofa sili a le Tamā i lana foafoaga. O ia o le tamaitiiti ua mana'omia tele, alofagia tele, ma mo'omo'o tele. Ma o lenei tamaitiiti o lo'o ta'oto i le mea e fafaga ai manu o le Perenise o le Filemū, o le Tupu o tupu.

O lenei taimi maoa'e ua fa'aalia mai iā i tatou le manatu moni o le mativa. O Maria ma Iosefo ua ta'u maia se tasi o moni tele lava: Ua na o le Atua e tasi lava. O le a se isi mea e toe fa'anaunau i ai i lo le iloa o ia o lē na vala'auina e le Atua ma o lē o le a latou fa'aigoaina o Iesu, Fa'aola, Emanuele, o le Atua – ma – i – tatou.

Ua ta'ua Iesu o le ulumatua a Maria. E lē fa'apea ai la na ia fanaua mai nisi tamaiti. Ae ua a'afia ai i lona uiga o ia o lē na vala'auina le Alo e to'atasi a le Tamā na avea ma tagata i totonu o ia, o lana 'ulumatua', ua iloaina i le aiga fou o Iesu o le i ai le tele o uso ma tuafafine. O ia o le ulumatua o le foafoaga atoa; iā te ia, le Upu e fa'avavau a le Tamā, ua faia mea uma, ma o mea uma ua faia i le va'aiga o ia na sau i le lalolagi nei o le malamalama ma le ola a le lalolagi. O ia o le ulumatua; o le To'atasi na e i ai le aiā tatau i lona fanau mai e ta'ua ai le Atua Silisili'ese, o lona Tamā. Ua na

o ia le Alo na fanauina ae o le ulumatua; ona na mana'o o ia e ta'ua i tatou uma o ona uso ma tuafafine ma fa'atasi atu ma ia i le tagi o le fiafia, 'Abba, Tamā.' Ona o ia ua mafai ai ona tatou fa'apea atu, 'Lo matou Tamā'. Ma ona o ia fo'i lava ua tatou maua ai le aiā tatau e vala'auina ai Maria, o lo tatou tinā.

Le Atua pa'ia silisili 'ese, ua matou to'atutuli ma vivi'i lou atamai.

Matou te vivi'i iā te oe le ulumatua a Maria,

Na o 'oe le Alo e to'atasi,

o 'oe ua aumai iā i matou mea uma lava

Ma iā 'oe ua e aumai iā i matou mea uma lava,

ma iā ia ua e fa'aagava'a ai i matou

e vala'au oe o lo matou Tamā.

Matou te vivi'i atu iā te oe,

ona ua e fa'aalia lou itū fa'atamā

ma le agalelei o lou alofa fa'atamā,

i le tu'uina mai iā matou o Iesu o se uso

ma Maria o so matou tinā.

Ia atagia mai lou agalelei i o matou olaga atoa,

ma ia olioli o matou agaga iā te oe ma le olioli ua

e aumaia iā i matou

Ona o Iesu Keriso.

Matou te fa'afetai tele ai.

Ia sau i luga o matou lou Agaga Pa'ia

ina ia avea ai o matou olaga atoa o le fa'afetai

molia,

ofo, ifoga ma le vivi'i i lou igoa.

Maria e, atonu o se fiafiaga tele i lenā taimi

o le mafatia o le fanau mai o se pepe,

o le tigā o le alu 'ese atu, le mativa o le fa'atau

ua na o ni va'aiga o tua atu o lou fiafia.

Ua leai se isi 'oa ae na o Iesu, o lau ulumatua;

Ma e leai fo'i se isi ou fa'anaunauga i lo le

fa'ate'ia

o le fa'atuatua iā te ia o le Emanuele,

o le Atua ma i tatou, lo tatou fa'aolataga

ma lo tatou fiafia.

Tatalo mo matou ina ia matou maua lenā

mativa o le agaga ua mafai ai ona matou mulimuli

ia Iesu,

lo matou 'oa e tasi

lo matou alofa e tasi ma iloa ona alofa fa'atasi

ma ia latou uma na ia sau i ai o se Fa'aola.

Tatalo mo matou uma ina ia matou avatu

lo matou fa'atuatua atoa ia te ia, Amene...

*fa'aauau pea...*

# O LE ALA I LE FEGALEGALEA'I PO'O LE FA'ASINOTI E AMATA I PALISI

O palisi Katoliko uma i le lalolagi ua vala'auina ina ia amatalia le fa'agasologa o le fa'asinoti. E amata i le fa'alogo.

O Pope Faranisisi, e masani e masalosalo ma fa'atalitali i ana fa'aaliga e faia ma le mautinoa o ona uso epikopo i le tapunia o la latou sinoti i le 2015 o le Ekalesia i ana pulega ma le fa'ataunu'uina o lana misiona po'o ana tala'iga i le mileniuma tolu o le a fa'asinoti. O le 'auala tonu lenei fa'asinoti na fuafuaina e le Atua mo le Ekalesia o le mileniuma lona tolu. O le Fa'asinoti po'o le fegalegalea'i la o le auala lea o le a savalia.

Mo tagata fai malaga a le Atua, o se fa'atusa mau-tu fa'atusi pa'ia o le Ekalesia, na tu'uina maia fa'avae fa'alemalo e le Vatikano II o le *Lumen gentium* na fa'apea mai, o le lu'itau na tu'uina mai e le Tamā Pa'ia iā tatou *faimalaga fa'atasi* ua notia ai tagata uma ua papatisoina e tomanatu i o tatou fa'asinomaga o tagata ua fa'amatalaina i la tatou mafutaga ma le Atua, ma fesiligia pe fa'apefea ona tatou faimalaga fa'atasi i lenei malagasā ma fa'amanino po'o fea tonu o lo'o i ai le tatou taunu'uga. O tapenaga aga'i i luma e foliga mai e lavelave i le iloina o le fa'asinoti e a'afia ai se fa'agasologa, ma se fa'aauau mautinoa. O se ulua'i manatu e mafai ona aumai e se tasi mai nei tusitusiga mai le Ofisa o Sinoti o Pope Faranisisi ua fa'amoemoe mo se auala fou o le avefa ma Ekalesia, una'ia e se fa'atalanoaga fa'aauau ua fuafuaina i le va o le au papatiso. O le sini po'o le taunu'uga vave (*terminus ad quem*), o lo'o aga'i i ai lenei auala o le Sinoti a Epikopo ua fuafuaina i Roma mo le tausaga 2023. O le mataupu fa'avae o le fegalegalea'i o se fa'ata'ita'iga a le pulega a le Ekalesia ma le va'aiga e uiga i le tala'iga a le Ekalesia sa fa'aputu mai tausaga e lua na amata savalia ai ni tapenaga o le fa'avae ai o mataupu o le sinoti i le 2023. O le Failautusi Aoao o le Sinoti, le Tama'ita'isā Farani o Natalie Becquart, e i ai le aiā e palota ai. E le o mautinoa ile taimi nei ia i latou ua tofia e le o ni epikopo o le a 'au ai o ni sui i le sinoti, pe to'afia, pe mafai fo'i iā i latou ona palota.

O le Sinoti ma le Fa'asinoti ma le naunauta'iga, ua va'aia o se fofō mo fa'aletonu o lo'o i ai nei ma se auala fa'afanua ua folafolaina mai e fa'atonu-tonu ai se Ekalesia mo ā taeao o le a tali mai ma le fa'atuatua i le va'aiga fa'aekalesia na mua'i ta'oto mai le Vatikano II. E i ai fo'i le manatu e mafai ona te'ea e epikopo le manatu e faia se sinoti,

atonu ona ua va'aia ai le malepelepe i le ituiaga o Ekalesia sa taumafai i ai ma su'esu'eina i le Latina i Sisifo ua sili atu ma āfe tausaga po'o ona o le vaivai o le faiga fa'asinoti o lo'o va'aia i lalolagi a le Orthodox ma le Egelani, po'o ona e lē to'a-filemū epikopo i lea manatu ona o nisi mafua'aga. Po'o fea lava, o se auala fa'asinoti ua fa'amaopo mai ma le fiafia po'o se tasi ua le mafai ona fa'atosiga i so'o se tulaga fa'atonu lava fa'afasitepu a le Ekalesia, e ao ona malamalama i palisi a le lalolagi. O le pote masani a le au papatiso i aiga, o tagata ua fa'afeso'ota'i i le taimi muamua, ua fuafuaina i ona sologa manuia.

O lenei auala fa'asinoti ua amata ona fa'atinoina e le Ekalesia i Siamani, Ausetalia ma Aioleni. I le fa'ai'uga o le vaiaso i le aso 17 Oketopa 2021, o palisi Katoliko i Egelani ma Ualesi na vala'auina e o latou epikopo e amatalia le faiga o le sinoti. E amata i le fa'alogo, i le Agaga Pa'ia. Ona soso'o ai lea ma le a'afiaga o talanoaga i le va o le 'au papatiso e uiga i mea tau i le Atua, *sacra conversatio*, o se vaega e lē masani ai Katoliko e musuā e fa'aali o latou lagona po'o le fa'aali atu i isi o latou olaga fa'aleagaga. O lona uiga o le fuaina o le tātā o le fatu a le palisi. E taumafai e maua mai ni *fa'alogo'aga*, pe fa'amoemoe e aoao mai *lagona* ma e taumafai fo'i e selesele mai *manatu*.

O pote masani a palisi i le fa'aogaina o fa'ata'ita'iga fa'asinoti (fa'ata'ita'iga i se manatu o lenei faiga e le'i faia muamua, ae ia aunoa ma le fa'aailoga tagata i le avefa ma vaega tumau o le lumana'i o le Ekalesia fa'asinoti) o e le i ai se a'afiaga i talanoaga fa'asinoti a o aga'i atu i luga i ta'ita'i. E aogā le tomanatu atili i le nofoaga na amata mai ai, o le palisi lea.

O le amataga o le upu 'sinoti' ua aumai ai se manatu o ni fa'apotopotoga o tagata e tutusa o latou manatu e malaga fa'atasi. O se fa'apotopotoga fa'apalisi, ina ua ulua'i fa'aailoa atu i ai lenei manatu, o le a fesili pe o le a a'afia ai i lenei faiga le faimalaga mai le leaga i le lelei, mai le tuai i le fou, mai le taumafai, su'esu'e ma fa'atuatua i le fa'ata'ita'iga, po'o le lē fa'aogaina sa'o o le fe'au a le evagelia i se fa'aaliga moni o fuafuaga a le Agaga mo tagata o le Atua. E le ua tatou i ai nei i le malaga o le tatala atu o le va'ai mamao a le Vatikano II o se moni? I le ola ai i le tele o le lē mautonu ma suiga, aemaise i le ola mai ai i le Koviti – 19 ma le fa'alavelave iā tatou faiga masani na aumai ai, e le o le taimi 'ea lenei e fa'amautū ma faia le fa'ata'ita'iga ua tatou iloina ma masa-

# O LE ALA I LE FEGALEGALEA'I PO'O LE FA'ASINOTI E AMATA I PALISI

ni ai e fa'agalua ai ia lelei atili?

Ae le'i faia se fa'ai'uga e malaga fa'atasi, pe tu'utu'u atu i se talanoaga laua'itele e uiga i o tatou poto masani o le avea ma Ekalesia ma fa'aleo atu o tatou fa'amoemoega mo lona lumanai, e tatau ona va'ai i le 'ese'ese o tagata o fa'apotopotoga a palisi. O le popolega tele vave mo latou uma i le taimi nei o le toe fo'i i taimi ma mea 'masani': toe fa'aleleia mea tau tupe, fa'aolaola galuega fai a le palisi, fa'aauau polokalame o sakalameta, toe faia o polokalame kapite ma toe fa'aoloina a tatou sauniga i le toe faia o mea masani (fa'ata'ita'iga o pese)na tu'u fa'amalosia e le fa'ama'i. Atonu fo'i ua leva ona lē toe va'ai le faife'au i foliga o lana fa'apotopotoga a o lauga ia i latou, tu mai tua o le aletale, pe tufatufaina le komunio. E aogā fo'i le maitauina afai o le fa'amagalo i le mae'a o le Koviti o le tatala mai ni avanoa mo le toe mafafuina o le Ekalesia, o fuafuaga mo se auala fa'asinoti ua fa'atulaga i le mae'a o le fa'ama'i po'o le fa'ausaga o se vaega lea o le talanoaga na faia e se vaega o katinale i la latou fonotaga i le 2013.

16

## O le tala'aga a palisi

E tāua le maua o se āta manino lelei o vaega fa'avae e o'o lava i palisi laiti ma le fa'atauva'a. O le tele o Palisi Katoliko i nei onapo i atunu'u 'ese'ese e filogia i tagata mai isi atunu'u ma ituaiga 'ese'ese, ole to'atele o sulii o le fa'apotopotoga na soifua mai i le fa'atuatua Katoliko i isi nu'u ma atunu'u ma e 'ese fo'i lo latou masani i le patipatia o le sauniga. E o'o lava fo'i ile faife'au pe na fanau i se isi atunu'u. O le a'afiaga i le olaga fa'apalisi o le a 'ese i tulaga 'ese'ese: latou e 'au atu i Misasa i aso ta'itasi; o tagata e fa'atinoa ni 'au'aunaga pe ofo atu o latou taimi ina ia alualu lelei pea galuega fai a palisi; o le fa'apotopotoga i Misasa i aso Sa, o le to'atele o Katoliko ae o lo'o va'aia le ekalesia o se pamu penisini fa'aleagaga; latou ua va'aia le falesala palisi o la latou aiga fa'aleagaga, ma manatu pea o se galuega patino, a mana'omia e latou aiga e patipatia ni sauniga e pei o le papatisoga, fa'aipoipoiga ma maliu.

O le to'atele o fa'apotopotoga a se palisi ua foliga mai e i ai lo latou mana'oga e fai pea mea ua masani ai i lo le tuliloaina o le auala o le vai fa'asinomaga o lo'o tau aumai e le auala fa'asinoti. E leai ma se faiga ua tufaina atu e le faife'au palisi po'o le au fa'atuatua ile fa'alogo o le

tasi i le isi, mai le tatalaina o tatou taliga i musumusuga a le Agaga Pa'ia, mai le fa'asoa atu o tatou lava fa'aosofiaga pe fa'apefea ona fa'aoloina o tatou olaga fa'ale – ekalesia, i le fa'alogo i mea o lo'o fai mai ai isi fa'apea le va'ai atu pe fa'apefea ila tatou falesala ititi ona maua lona tulaga i le ekalesia a le lalolagi ua tatou ta'ua o le "Ekalesia Aoa".

## O le fa'alogo

Afai o le fasitepu muamua i le auala fa'asinoti o lo'o fautuaina mai o le fa'alogo, atonu e manaia ae tomanatu i mea ua tatou fa'alogo ai i palisi. O le mea muamua ma le tāua ua tatou fa'alogo uma i ai o le Upu a le Atua, folafolaina e le au faitau, ma tofitofi mo tatou e le ta'ita'i i lana lauga. Ua fa'alogo le ositaulaga ua ta'uta'u e ona tagata lo latou fa'atuatua i le Atua – Tamā, Alo ma le Agaga Pa'ia. Ua fa'alogo le aofia i lo latou faife'au ma latou i autafa ua ta'uta'u lenā lava tatalo o le fa'atuatua. I le sauniga ua tatou fa'alogo ai i musika, ma ua tatou fa'alogo ai i o tatou lava leo ma le fa'apotopotoga o pepese i vi'iga o le Atua. Ua tatou fa'alogo i tatalo ua faia e le ositaulag mo tatou; ua tatou fa'alogo i upu o le fa'avaeina o le Eukalisitia, ma ua tatou fa'alogo i le vala'au ina ia talia le Tino ma le Toto o Keriso. Tatou te vivi'i le Atua e tasi ma iloaina, po'o le a lava lona lē mautinoa, o lo'o i ai fa'apotopotoga i le lalolagi atoa e pei o tatou o lo'o fa'asoa i lenei fa'atuatua Katoliko ma patipatia le Aso o le Ali'i i le auala e tasi e pei ona tatou faia. Ua tatou iloaina o lenā ua avea ai le Ekalesia e Katoliko moni.

O vaega ua tatou fa'alogoina i Misasa, aemaise i le Aso o le Ali'i pe a tatou tolaulauina le Tatalo o le Fa'atuatua, ua fa'amautinoa e lē na o tatou ia tatou talitonuga. O le mea moni lava, o aso Sa ta'itasi ua tatou fa'amanatu ai iā i tatou le mea ua tatou talitonu i ai. Ua tatou fa'alogo e i ai o tatou uso ma tuafafine ua fa'asoa ma i tatou le fa'asinomaga ua fa'ae'eina mai i le papatisoga, o lo'o talanoa mai pea le Atua ma i tatou ma o le ala fa'aleagaga ua tatou savalia i le aso o lo'o tatou papatisoga ma o le ute o le fa'asinoti ona o lo'o tatou i ai pea fa'atasi ma latou ua fa'asoa le ala, sa'osa'o ma le vāiti a tonu e ui atu i le ola e fa'avavau. O lenei manatu maumaututū ua alia'e ma fa'amausalī i taimi uma tatou te 'au ai i se Misasa Katoliko a se maliu.

## Talanoaga

E masani o Katoliko e lē fa'asoa i isi pe talanoa



# O LE ALA I LE FEGALEGALEA'I PO'O LE FA'ASINOTI E AMATA I

## PALISI

fo'i e uiga i o latou tagata loloto po'o mataupu fa'alaua'itele fa'aleagaga. O le ta'ua o mea tau le Atua i talanoaga i lea aso ma lea aso e masani e fe'alofa'i. O le fa'alauiloaina o le auala fa'asinoti po'o le fegalegalea'i atonu e talatala mālie mai ai faitoto'a o āna o olaga i totonu, ia ma lea, o le va'aiga fa'aleagaga o le a sau fa'atulutulu i lo se lolovai. E moni o palisi Katoliko o nofoaga tutotonu o talanoaga. E ui o talitonuga fa'asoaina i mataupu tau i le fa'atuatua ua le manatu tele i ai, o lo'o i ai pea le manatu e uiga i falesā ma isi vaega, o lo'o i ai pea manatu e uiga pe fa'apefea i le Faife'au ona faia ia mea i se ala e sili atu pe 'ese fo'i ma, ona o le tele o tagata e matamata i tv, faitau i niusipepa po'o i luga o tafa'ilagi, o lo'o i ai manatu e uiga i le Pope, o le Misasa tuai ma vaega o a'oa'oga a le Ekalesia ua lu'itauina. Ina ua fa'ailoa mai e Pope Faranisisi le auala fa'asinoti i le Ekalesia, na tausisi e tatau ona fa'amanino i le *fegalegalea'i*, 'auai ma le *tala'iga*. Ona o le nofoaga mo le fa'ailoaina o lenei auala o palisi ta'itasi ma afai o lenei faiga fou o le aveva ma Katoliko e le'i fa'ata'ita'ia i tulaga tau palisi, e tāua e i ai se paleni o le malamalama'aga o fuafuaga a le Tamā Pa'ia. E lelei le āuāu ta'itasi o nei vaega o le auala fa'asinoti ma fa'aogā i le fa'atulagaga o palisi. So'o se fa'atalanoaga lava tau i le lumana'i e fuafua ile malamalama'aga po'o fea o lo'o tatou tutū ai i le taimi nei. E tāua le manatuaina o Katoliko o latou ia o lo'o i nofoa o falesā i aso nei, o latou fo'i ia o fa'avae autū o le Ekalesia a taeao; ua tatou aumaia ma i tatou a tatou poto masani, o tatou fa'afitauli fa'apea ma a tatou fa'asinomaga o ni Katoliko.

### Fegalegalea'i

A tatou tolaulauina le Tatalo o le Fa'atuatua i Misasa i aso Sa, ua tatou ta'uta'u o tatou talitonuga i le 'fa'apotopotoga o tagata pa'ia. E masani ona fa'ailoa e Sagato Paulo o ia lava i 'tagata pa'ia' i Filipi po'o Efeso, lona uiga o le Kerisiano fa'atuatua. Atonu tatou te fa'anaunau i se tu'u fa'atasiga atoatoa ma tagata pa'ia, ae ua tatou iloaina ona o tatou ua papatisoina ua tatou i ai i le tuā'oi o lona fegalegalea'i. Ua tatou i ai fa'atasi ma latou ua fa'asoa ma ta'uta'u le fa'atuatua Katoliko. O tatou o uso ma tuafafine i le Ali'i, fanau fai a le Atua. Ua tatou auai fa'atasi i le faiga'ai o le Eukalisitia, talia le Tino ma le Toto o Keriso mai le laulau masani, ma ua tatou fa'aigoaina lona taimi o le feso'ota'iga vavalalata ma le Ali'i i lenei itū o le fa'avavau Komunio Pa'ia. Ua fafagaina fo'i i tatou i lenā lava mea'ai

a o tatou fa'alologologo fa'atasi i le Upu a le Atua, malamalama ai e pei ona a'oa'oina mai iā i tatou e le Ekalesia. O lo'o tatou feso'ota'i ai ma Roma, lona uiga o a'oa'oga fa'aleagaga e pei o le epikopo a Roma ma isi epikopo Katoliko o lo'o feso'ota'i ma ia.

### Auai

E ao ona toe va'ava'ai pe fa'apefea ona o tatou o ni pa'aga i le alualu lelei o a tatou palisi o lo'o a'afia ai i lona olaga ma lana tala'iga. O le auai e i ai ona aiaiga i ni vaega se tolu. Muamua o le malamalama'aga i le natura o le Ekalesia, o lona tala'aga, ana tu masani, o ana talitonuga, ma lona tulaga ile lalolagi i aso nei, amata mai i tua'oi o a tatou palisi. Lona lua o se fa'anaunauga loloto e a'afia i lona olaga ma le mafai ua tatou maua (tulaga tau tupe, malamalama fa'akapite ma le atamai e a'oa'o atu, se leo lelei e pese atu ai po'o se malamalama lelei i musika) i se lafoa'ia a ni pisinisi tu'ufa'atasi. Lona tolu, atonu o se vaega pito sili le faigatā ma le mana'omia, o le vituti Fa'a-Ikenasio o le loto fuatiaifo ua fa'amuumua le lelei laua'itele i so'o se fa'aleagaga fa'aletagata, manatu fa'apito fa'atelosia po'o le va'ai mamao pe fa'apea ona tatau ona fa'atulaga mea uma.

### Tala'iga

Mai le amataga lava o lenei nofoa'iga i lana ulua'i Apoapoa'iga Fa'aapopotolo, *Evangelii Gaudium*, na tausisi mai Pope Faranisisi o le Ekalesia o le tala'iga. O le fe'au a le evagelia, ina ua folafolaina e latou ua papatisoina ma fa'aoga e tapasaina ai o latou olaga, na pei o se fa'ama'i. O le tatalaina ole auala o le fegalegalea'i ua vala'auina ai palisi ta'itasi e su'esu'e iā ia lava i le ma'elegā o lana tala'iga ma aumai nisi auala e sili atu mo feso'ota'iga oni Kerisiano papatisoina, ma lenei lalolagi fa'aonaponei. Tala'iga e amata i se fa'anaunauga tele e fa'asalalau atu le Tala Lelei mo le lelei laua'itele mo latou o le a fa'alogoina ma fa'atāuina lona fa'atatauina o le fa'aopopo i le lelei o le olaga o le tagata. O le Tala Lelei e lelei iā ia lava ae lelei i ona a'afiaga ona ua ia fa'aopopo i ai le fi'afiaga ma le saogalemū o latou ua fa'alogo i ai. Tala'iga o le a a'afia le 'a'apa atu iā i latou e le'i masani lelei ma le fe'au moni a le evagelia, iā i latou na fa'atigaina ma lē fiafia po'o latou ua fevaevae'i mai isi ma tatou. Fai mai se tasi o le auala o le fegalegalea'i ua aveva ai le Ekalesia o se fa'aleleia o manu'aga. O le Tala'iga e tatau fo'i ona malamalamaina o se lotomalie (ma le

## O LE ALA I LE FEGALEGALEA'I PO'O LE FA'ASINOTI E AMATA I PALISI

mafai) ona ulufale atu i nofoaga faitele ma tautala atu e uiga i mea tau i le Atua i so'o se nofoaga lava ua fialia le sosaiete e tu'uina mai ia i tatou.

### Fa'ai'uga

O le to'atele o tatou tagata palisi o lo'o sologa lelei le soifua maloloina. O le fa'ama'i ua faia nei sona lafoga, ae o se taimi fo'i o le kalasia. O 'au'aunaga ua tula'i mai ia tatou fa'apotopotoga, le au galala mo le Eukalisitia sa tauaveina e tagata palisi ona o le tu'ufua, le masani i sauniga i luga o tafa'ilagi ma le fa'anaunau e toe fo'i i le patipatia fa'atasi ma uso ma tuafafine o le Misasa i aso Sa a palisi, le manatu i le soifua maloloina o tatou tu'aoi ma le au matutua ma a tatou aiga palisi ua tu'ufa'atasia ai se loloto o tatou manatu o

ai i tatou ma la tatou talisapaia o mea ua tatou ausia. E to'atele tagata ua latou iloaina o le agalelei e tele sona suiga o le a maua mai ai.

O le auala fegalegalea'i atonu o le a ta'ita'ia i tatou aga'i i se auala fou o le avea ma Ekalesia. O talanoaga a amata e i ai fo'i o latou olaga, ae a tatou tatala le talanoaga ina ua fa'alologo i le Agaga Pa'ia ma le tasi i le isi, fa'afetai mo le measina ua ta'ita'iina ai i tatou ma talisapaia lena a'oa'oga Katoliko o se talitonuga loloto fa'al-etino, ona mafai lea ona tatou feutaga'i ma le mafanafana i se tala'iga i se lalolagi fa'aonaponei. O se maitauina ma le fa'aeteete e fa'ai'u ai: O le Agaga o le fa'amasino mulimuli o so'o se miti, fuafuaga po'o ni talosaga.

## FAITAUGA MO LE MASINA O MATI – 2022 TAUSAGA C

**Aso 6 Mati - Aso Sa Muamua o le Fagafulu: Faitauga Muamua:** Teuterenome 26: 4 – 10. Matua: Ua ta'utino e le nu'u filifilia lo latou fa'atuatua.

Salamo: 91: 1 – 2 (tali), 10 – 11 (tali), 12 – 13 (tali), 14 – 15 (tali). Tali: Le Ali'i e, ia e lavea'iina a'u i le puapuagā.

Faitauga lona lua: Roma 10: 8 – 13. Matua: O le ta'utinoga o e fa'atuatua iā Keriso.

### FUAIUPU MO LE EVAGLEIA!

E lē na o mea e 'ai e ola ai le tagata, a o afioga uma e tulei mai i le fofoga o le Atua.

Evagelia: luka 4: 1 – 13. Matua: Ua ta'ita'iina Iesu e le Agaga i le mea tu'ufua; ua fa'aosoosoina.

### *Tofitofiga o le Upu:*

E mafai e se tasi ona faia se tulaga mo le fa'amanatuina ia tatou e tatau ona tatou mafaufau i le vaega fa'afanua i tulaga tau telosia pe a tatou asiasia le Tusi Pa'ia. O faitauga o le Fagafulu ua fa'asino tonu i lea vaega. O lo'o i ai le tele o vaega o le vaotu'ufua po'o le toafa i le Ogototonu i Sasa'e, ae o le tu masani fa'atusi pa'ia, o le toafa o le toafa lava ia o le Esoto, o le nofoaga sa faimalaga ai le Atua ma ona tagata ma na iloa ma a'oa'oina ai tagata i le Atua ma mea e uiga i le Atua. O lona uiga a tatou mafaufau i le toafa o se nofoaga ua na o se leai o ni mea o i ai ua tatou misia le manatu autū – o le nofoaga tu'ufua o se nofoaga o le auai – le auai o le Atua. E fesoasoani tele lenā pe a tatou tomanatu i le Fagafulu o se faigamalaga i le toafa – tatou te o i ai ina ia fa'ama'imaui sina taimi ma le Atua o lo'o faimalaga ma i tatou.

E mafai fo'i ona tatou fa'aogaina lena tomanatuga e sa'ili'ili ai le nofoaga na tupu ai fa'aosoosoga e tolu a le Ali'i i le Evagelia o le asō. O le fa'aosoosoga muamua sa i le toafa, ma na uiga i falaoa, ua o tutusa ma le manai i le toafa i le tusi o Esoto. Mo le fa'aosoosoga lona lua, ua ave a'e Iesu i luga o le mauga – ma afai o le togavao o le toafa a le Esoto, o se mauga o lona masani o le Sinai – le nofoaga o le feiloa'iga ma le Atua, ma e tele ni tala mai le Tusi Pa'ia o lo'o feiloa'i atu ai le au Pateriaka ma perofeta i le Atua i luga o mauga. Ma mulimuli lava, na fa'aosoosoina e le tiapolo Iesu i autafa o le puipui o le malumalu – le nofoaga i lona fa'atumutumuga lava na filifilia e le Atua e fa'atasi ai ma ona tagata.

E aoga le tomanatu i fa'aosoosoga nei a le tiapolo e le aoga ona o latou nofoaga o lo'o tagitagi mai ai le afio ai o le Atua. O se mea lenā e tatau ona fa'amalosi'au iā i tatou uma i le vaitau o le Fagafulu. A

fa'aososoina i tatou, e lē fa'apea ona e lē o afio ai le Atua. E i ai pea le Atua i taimi uma, ma ole Evagelia o le asō ua fa'amanatu mai iā i tatou o le tulaga fo'i lenā pe a tatou feagai atu i fa'aosoosoga.

**Aso 13 Mati - Aso Sa 2 o le Fagafulu: Faitauga muamua:** Kenese 15: 5 – 12, 17, 18. Matua: Ua osi e le Ali'i le feagaiga ma Aperamo.

Salamo: 27: 1 (tali), 7 – 8 (tali), 9 (tali), 13 – 14 (tali). Tali: O le Ali'i, o lo'u malamalama ia ma lo'u olataga.

Faitauga lona lua: Filipi 3: 17 – 21; 4: 1. Matua: O le Ali'i o Iesu Keriso na te liua o tatou nei tino fa'atauva'a, ia fa'atautu i lona tino maliu.

**FUAIUPU MO LE EVAGLEIA!**

O le si'ufofoga o le Tamā mai le ao pupula ua fa'apea mai, O lo'u Atali'i pele lenā; ia outou fa'alogo iā te ia.

Evagelia: Luka 9: 28 – 36. Matua: O lo'o tatalo Iesu, a ua liua ona fofoga, ua pa'epa'e ma pupula tele mai ona ofu.

***Tofitofiga o le Upu:***

E pei lava o faitauga mo le Aso Sa muamua o le Fagafulu e masani lava e ta'ita'ia i tatou i le togavao, ma e pei o le togavao e masani o nofoaga o le malaga 'ese atu (Esoto), le nofoaga na fa'asa'oloto ma fa'atasi atu ai le Atua ma ona tagata ma fafaga i le manai, e fa'apea fo'i faitauga o le Aso Sa lona Lua o le Fagafulu e masani ona ta'ita'ia i tatou i luga o mauga, ma o le mauga e masani o nofoaga tāua fa'atelosia ma le fa'afanua. E tele mauga o lo'o fa'asino i ai le Tusi Pa'ia, ae e masani ona latou tauavea ni fa'auigaga o feiloa'iga ma le Atua: Mauga o Ararata, le mea na mua'i avatu ai e Noa le faiga taulaga i le Atua i le mae'a o le lolo; Moria, le nofoaga na alu atu i ai Aperamo e ofo atu Isa'ako e momoli ai le faigataulaga; i Sinai, le nofoaga na talia ai e Mose le Tulafono; o Horepa, le nofoaga na feiloa'i atu ai Elia i le Atua ma na fa'apa'iaina e tauavea le galuega a le Atua, ma le Mauga o Siona le nofoaga na fa'avae ai e Tavita Ierusalem ma Solonmona na fausia le Malumalu. O le mea lea e aogā le maitauina o luga o le mauga o le Liua o fofoga o Iesu e to'alua ni tagata autū, Elia ma Mose na fa'atasi atu ma Iesu ma na tautatala mai e uiga i ona puapuaga o le a ia ausia i Ierusalem. O Mose le na talia Poloa'iga i luga o Sinai, ma Elia le perofeta sili, ua tu'uina mai o ni sui o le Tulafono ma perofeta – o a'oa'oga atoa a le Feagaiga Tuai. O faitauga o le aso Sa i le amataga o le kalena o lenei tausaga ua aumaia ni Epifania se tolu – o le fa'aioaina o le tagata o Iesu i le au Makoi, i le papatisoina i le vai o Ioritana ma le fa'aipoipoiga i Kana. O le Evagelia o le asō o le isi lea Epifania – ua fa'aalia mai ai o Iesu o le fa'atunu'uga o le Tulafono ma perofeta, ma le leo mai le lagi ua toe fai mai ai upu a Iesu, ae ua fa'amaumauina ina ia fa'amausalī mai ai le tagata o Iesu, ma ua faia fa'apea i le fa'aogaina o le sini fa'atusi pa'ia o le Atua ua feiloa'i atu i ai i luga o le mauga ae e pei o so'o, tatou te mulimuli i le Ali'i i le mea e ta'ita'ia i ai tatou, o tatou fo'i o le a lagoonā le leo o le Tamā.

**Aso 20 Mati – Aso Sa 3 o le Fagafulu: Faitauga muamua:** Esoto 3: 1 – 8, 13 – 15. Matua: E te fai atu i le fanauga a Isaraelu, O A'U O LĒ OLA, o ia na auina mai a'u iā te outou.

Salamo: 103: 1 – 2 (tali), 3 – 4 (tali), 6 – 7 (tali), 8, 11 (tali). Tali: E alofa mutimutivale ma alofa fua mai le Ali'i.

Faitauga lona lua: 1 Korinito 10: 1 – 6, 10 – 12. Matua: O mea na o'o iā Mose ma lona nu'u ua tusia e fai ma apoapoiga mo i tatou.

Evagelia: Luka 13: 1 – 9. Matua: Afai tou te lē salamō, e fa'apenā lava ona fano outou uma.

***Tofitofiga o le Upu:***

O le ā se uiga o se igoa? O se rosa ea i se isi igoa e manogi manaia; fai mai ai Juliet ae o lenā taimi atoa na ia iloaina lelei lava o le igoa o le tama o Romeo o le fa’afitauli lea, ma o lona igoa o le a au-mai ai ni i’uga pagatia. O moni o igoa e tāua tele – o le mafua’aga lenā tatou te lē fiafia ai i le manatu o tatou ua na ‘o se numera i le sosaiete. O le faitauga mai le Esoto a Mose i le afi mumū i le la’au talatala e tāua tele ona o le fa’aalia o le suafa o le Atua na suia atoa ai le feagaiga i le va o le Atua ma ona tagata. Ua tele ni tusitusiga sa faia e ni ‘au atamamai e uiga i le auala tonu e malamalama ai i le igoa e faigatā ona fa’amatalaina na fa’asoa e le Atua ma Mose, ae o le mea tāua o le iloaina o le igoa o le Atua ua maua ai e tagata se mafutaga uiga’ese ma ia. O mafutaga uma fa’aletagata e ‘ese’ese pe a tatou iloaina le igoa o le tagata ua tatou feiloa’i atu i ai, ma e masani tatou te fa’aogaina ni igoa tauvala’au po’o ni igoa o tatou manu fafaga ua fa’amatala mai ai mea fa’apitoa e uiga i le mafutaga. I le Tusi Pa’ia, Apera’amo, Sarai, Simona ma Saulo o igoa fou uma na avatu e fa’amatala ai o latou tagata fou na avatu i ai le galuega a le Atua ma le fa’atuatuga. E tataua ona tatou maitauina a tatou amata le Misasa po’o ni tatalo, tatou te amata i le suafa o le Tamā ma le Alo ma le Agaga Pa’ia - se mea ua fa’amatala ai le natura o la tatou mafutaga ma le Atua ua sau iā i tatou o le Tasitolu.

O le Evagleia o se tasi ia o a’oa’oga a Iesu i le Evagelia e uiga’ese iā Luka. O se tusitusiga ua talafeagai mo le Fagafulu a o lu’itau latou ua fa’alogo e ave’a’i le vala’au ina ia salamō fa’amaoni. I le taimi lava lea, o le fa’ata’oto o le la’au o le mati ua ofoina mai le fa’amoemoe o lo’o i ai lava le taimi mo lenā salamo ina ia aoga ma maua mai ai ni fua.

**Aso 27 Mati- Aso Sa 4 o le Fagafulu: Faitauga muamua:** Iosua 5: 9 – 12. Matua: Ua o’o le nu’u o le Atua i le lau’ele’ele sa folafolaina, ma ua latou ‘a’ai i le paseka.

Salamo: 34: 1 – 2 (tali), 3 – 4 (tali), 5 – 6 (tali). Tali: Inā tofotofu ia outou, ma ia outou iloa e lelei le Ali’i.

Faitauga lona lua: 2 Korinito 5: 17 – 21. Matua: Ua uma ona fa’aleleia e le Atua o i latou iā te ia e ala iā Iesu Keriso.

## FUAIUPU MO LE EVAGLEIA!

O le a a’u tula’i ma alu i lo’u Tamā, ‘ou te fai atu iā te ia, Lo’u Tamā e, ua ‘ou agasala i Lē o i le lagi atoa ma ou luma.

Evagelia: Luka 15: 1 – 3, 11 – 32. Matua: O lo’u uso lenā na oti, a ua ola mai.

### ***Tofitofiga o le Upu:***

O le tele o mea e masalomia e misia e le tele o tagata i le vaitau o le fa’ama’i, ona o Tulafono ma pui-puiga, o potopotoga a aiga ma uō ma fa’asoa i ni faiga’ai – aemaise lava o mea’ai e patipatia e masani e to’atele ai tagata fa’atamilomilo i le laulau. O taumafa ma faiga’ai e le na o ni taimi ave ai i totonu le malosi mo le ola fa’aletino; o avanoa lelei fo’i e fa’ailoa atu ai le moni tāua fa’aletagata e pei o le fiafia, fa’asoa, auai ma le tele o isi faiga. Ina ua taunu’u le au Eperu i le nu’u na folafolaina o Kanana i le vaitau o le paseka – le taimi na latou tu’ua ai Aikupito – sa latou ‘a’ai i fua o le ‘ele’ele, ma o le folafolaga na fai iā i latou i le sili atu ma le fasefulu tausaga muamua atu ua fa’ataunu’uina, ma o le ‘aiina o mea ‘ai ua fa’amatala mai ai lea fa’ataunu’uina. I le mae’a o tofotofoga ma puapuaga a le Esoto ma le femalaga’ai i le toafa, o lo latou fa’aolataga ua taunu’u ma fa’aalia i le taunu’uga i le nu’u i le ‘ele’ele, ma na fa’ailoaina ile ‘a’ai.

O le fa’ataoto o le atali’i fa’amaumau’oa e tutusa lelei, ma e tataua ai, ona o se fa’ataoto i le alofa o le Atua ma le agalelei, ae e tāua ona o le patipatia o le toe fo’i mai o le atali’i la’itiiti e lona tamā fa’amaumau’oa: *Tatou te ‘a’ai ma olioli, auā o lo’u atali’i lenei, na oti, ua toe ola mai.* E tāua fo’i o le atali’i usita’i – matua ua le ‘au ai i lea fiafia, ona ua le mafai ona ia fa’asoa le tula’i alofa a lona tamā. O aso uma ta’itasi e potopoto ai Kerisiano mo se mea ‘ai fa’amanatu e fa’aali ai le fa’ataunu’uina o folafolaga a le Atua i le fa’aolaina o ona tagata – fa’aolaina mai le agasala ma le maliu; ma o lenā mea ‘ai o se patipatia fo’i o le alofa fa’amaumau a le Atua, ma pau i latou e lē a’afia ai o latou e mumusu e fa’asoa i le alofa o le Atua.